

四明談助目錄

第八本南城二

卷十七

雪汀錄劉王舒陳唱和詩并謝山十洲志附新按

觀音橋採鮎埼亭集記錢康憲公宅述聞志

能仁觀音寺述延祐志陳忠肅寓錄宋史本傳并程史

周氏四休堂述聞志并族望表錄光祿師厚中大夫鐔

承奉銖裔孫字別錄知縣致隱君鼎諸傳附四休逸

事三則承奉詞一首

陳處士居述聞志錄遺逸之翰傳并湖語

梅花牆採勾餘土音注徐侍郎橋採鮎埼亭集并詩二首

四明談助 卷七

廣盈倉述聞志并敬止錄元時規制採輟耕錄敬止錄

周觀察第附新按錄副使應治光祿元孚公子嗣昇傳

并林泉雅集詩引太僕葭露閣附記逸事

常平義田書院述聞志并規制記月湖書院述曹志錢志

芙蓉洲錄劉王舒陳唱和詩并謝山十洲志附新按

感聖橋採鮎埼亭集附新按

常平倉義倉俱述寶慶志制置使平糴倉述寶慶志

史丞相府述聞志附新按列丞相彌遠樞密宅之觀文

宇之傳附杜清獻奏畧并史相逸事十三則

聞天官第述聞志附新按列冢宰淵參政澤刑部源

孝子龍孝子繼泰隱君性善徵君性道諸傳附逸



事三則 未記 聞園後歸于陳氏

李尚書第 述 聞志 附 新按 列 大宗伯康先 尚寶振璣 都

事振玘 明經立櫬諸傳 未記 李第改為江祠

李都督宅 列 都督涵武舉昌泉知縣恭寬知州承道諸傳

李孝子居 述 謝山撰孝子景濂傳 并 凱風說

范侍郎第 述 聞志 附 新按 列 訓導訥贈公璧侍郎欽吏部光

文知縣正輅 并 同族連傳 附 王弇州答司馬書

天一閣 述 曹志 錄 鮎埼亭集藏書記畧 又 碑版記畧 又 尊藏

御製圖書集成分部一萬卷 得勝圖共四十四幅 上

諭一道 御製詩五首

楊尚書第 述 聞志 附 新按 錄 大司空守隨 子 茂恕連傳

四明談助 卷七

黃府尹第 述 聞志 附 新按 錄 少司空景章傳

卷十八

松島 錄 劉王舒陳唱和詩王右仲松島歌謝山十洲志 并 按

正議樓公講舍 採 勾餘土音詩注 并 湖語

錦照堂 採 絜齋集 錄 寶慶志 并 湖語 錦照堂王氏 錄 知縣

文亮 連子 周傳

真隱觀 述 至正志嘉靖志 竹洲 採 十洲志 并 月湖丈尺圖

四明洞太古跡 錄 湖語注 採 史忠定洞天詩 鮎埼亭集洞

天記 又 真隱漫錄題詞 句餘土音洞天古跡詩

謝遺塵廟 附 新按 述 湖語 并 注

沈端憲居竹洲 述 湖語 錄 直閣煥徵君炳傳 附 呂忠公傳



史少師宅述嘉靖志錄少師彌大朝奉守之傳附謝山賜

府攷竹洲書院記

胡綏山居竹洲述續耆舊傳錄布衣奇佐詩一首

晏公廟述成化志錄鮎埼亭集碑記宋史晏尚書敦復傳

全氏別墅附新按謝高士祠古址錄鮎埼亭集碑記畧

花嶼錄劉王舒陳唱和詩又謝山十洲志附新按

湖心廣福寺述延祐志錄曾子固陳忠肅黃晉卿詩

十洲閣採舒信道西湖記錄宋王巨舒信道明沈嘉則詩

澄輝閣述嘉靖志又周彥廉詩滄洲閣廣生堂述嘉靖志

虞大令西湖鑿井採舒中丞西湖記

唐監引水注湖採舒中丞引水記并全謝山湖語

四明談助 卷七

湖心二名僧述敬止錄僧妙蓮道術錄鮎埼亭集并湖語

袁氏女置湖心廣生田節成化志敬止錄

蔣教授講學湖寺述族望表聞志湖語

宋忠臣袁公祠述聞志錄句餘土音詩并詩話

喬生月夜遇妖述瞿佑記月湖菴述聞志附新按

寶綸堂述嘉靖志附呂中父詩問字橋述敬止錄

柳汀錄劉王舒陳唱和詩又謝山十洲志附新按

衆樂亭述延祐志敬止錄錄衆樂亭詩序并錢公輔王安

石司馬光邵克吳中復鄭獬吳充王益柔

張伯玉陳舜俞胡宗愈詩樓攻媿月湖競渡詩

鮎埼亭集重建衆樂亭記畧



逸老堂述 乾道圖經并 聞錢二志

涵虛館述 嘉靖志錄 魏王愷傳 句餘土音詩 烏春草詩

賀秘監祠堂述 聞錢二志 改建湖亭廟述 聞志錄 陸康僖

詩 陳公籲竹枝詞 全謝山重建碑記 中柱對聯

賀祠雙柏錄 宋宏之雙柏記 胡道南雙柏詩

四明驛述 聞志又引 宋刻月湖圖 元金仁本詩 明成矩

四明驛館詩 孫醫士咏驛景

四宜樓 水雲亭錄 聞志并 陳公籲竹枝詞

十洲之一亭述 寶慶志記并 詩又 全謝山記 句餘土音詩

閩國公祠述 至正志附 新按 關帝廟述 曹志附 新按

芳草洲錄 劉王舒陳唱和詩又 謝山十洲志附 新按

四明談助 卷七

碧沚亭述 嘉靖志并 月湖丈尺圖

史朝奉別業錄 朝奉守之傳 吳制使碧沚詩

楊慈湖碧沚講學錄 鮎埼亭集書院記并 宋史本傳論 李

董山贊 呂忠公題史子仁碧沚詩

山澤居採 清容居士集 湖語注 袁清容山澤居詩

范司馬祠述 敬止錄附 新按 陳公籲竹枝詞



四明談助卷十七

月湖十洲先錄西岸之三址烟嶼錄竟茲再錄雪汀芙蓉洲于後

雪汀

劉戶部程雪汀詩

和者

王巨

舒亶

陳瓘

六出花輕巧剪裁瑤林玉砌映高臺冰澌四面寒光合疑有飛仙月下來

玉落風刀細細裁梁王宮裏舊池臺逍遙此地何人可除是冰膚駕鶴來

點柳粧梅不暇裁平波直擬瀉瑤臺釣磯葦岸知何許幾誤漁舟夜半來

四明談助

卷七

誰把平瓊水上開坐看飛絮撲瓊臺酒家耳熱笙歌沸應怪幽人此地來

謝山十洲志云烟嶼之下為雪汀即報慈觀音寺也王巨詩曰梁王宮裏舊池臺蓋指錢康憲公朱邸而言觀音寺橋當其南感聖寺橋當其北

自烟嶼過雪汀水亦兩分一由觀音寺橋入月湖一經感聖寺橋入月湖雪汀之上為錢康憲公宅為能仁觀音寺為陳忠肅南藍為周氏四休堂為陳處士居為趙袁州梅花墻在明為廣盈倉為周觀察第為葭露閣廣盈倉今為月湖書院等蹟

觀音橋

觀音寺橋久廢  
山及生已言  
作不宜出此



在今周觀察第旁以其在觀音寺南故名觀音橋其河已塞橋亦無存然掘地尚有河岸遺址可攷宋嘉定間月湖丈尺圖云豐尚書宅間處至觀音橋五十六丈八尺其界甚明白成化四明志已不載觀音橋蓋其道久塞故也

鮚埼亭集外編

### 錢康憲公宅

在西湖之上建隆間捨為觀音禪寺建炎寺燬嘉定間史忠獻請得之以為別墅景定間歸地復寺成化志以為賜忠定

誤也

聞志兼鮚埼亭集

### 節度使錢康憲公億

字延世吳越王俶弟事詳大人堂碑記并宋賢牧傳

### 能仁觀音寺

### 四明談助

### 卷七

在月湖之西舊號報慈院宋建隆間節度使錢億捨宅為之院記謂面枕平湖門橫綠野為四明望藍觀音像以諸香眾寶莊嚴初賜承天院額宣和間改能仁建炎之變觀音先期見夢寺僧亟移郊外淨嚴院獲免兵火後復迎歸嘉定中以其地賜丞相史衛王移其額于大慈山景定間史氏歸地復立寺

延祐志

明洪武十四年以其址為廣盈倉

敬止錄

### 陳忠肅寓

在月湖之西南劍陳瓘謫後居明州寓此著四明尊堯集

聞志

### 陳忠肅公瓘

字瑩中號了翁南劍州人元祐時攝通判明州事累遷至



右司給事中忤曾布補外崇寧二年除名竄廉州四年移  
郴州五年放還來明州寓居南湖之南藍貧甚裘葛不具  
簞瓢屢空晏如也忠肅在廉州時嘗著尊堯集意尚未愜  
復于四明著之謂紹聖史官專據王安石日錄改修神宗  
史不可傳信深明誣妄以正君臣之義周南雄鏐忠肅妻  
兄也時方家居相與悲憤時事商權成書始以為無憾云  
大觀中忠肅子正彙在杭告蔡京有動搖東宮迹杭守蔡  
疑執送京師下開封制獄知開封李孝稱希京旨并下明  
州捕忠肅士民哭送公不為動獄具正彙坐所告失實流  
海上忠肅亦安置通州時四年三月也十一月詔許自便  
政和元年正月從宰相張商英請詔下明州取尊堯集送

四明談助

卷七

三

編修政典局時忠肅已居通州五月再下通州取其書既

上而商英罷忠肅又徙台州矣

宋史及真  
隱漫錄

湖語至若龍圖之嬾堂

舒中丞  
直寓亭

周氏四休之別業

周南侍  
雄鏐

郎之息齋

高憲  
敏開

亦復相為上下而南藍則了翁尊堯之著

出焉尤有光于精舍

日錄一書本熙寧間荆公奏對之詞私所錄記紹聖以後  
稍尊其說以竄定元祐史牒蔡元度十又其壻方烜赫用  
事書始益章建中靖國初曾文肅布主紹述垂意實錄大  
以据依陳了翁壘為右司員外郎以書抵文肅謂薄神考  
而厚安石尊私史而壓宗廟不可文肅大怒罷為外郡尋  
謫合浦了翁始作合浦尊堯集為十論但辨其所紀載猶



未敢以荆公爲非及北歸又著四明尊堯集爲八門曰聖訓曰論道曰獻替曰理財曰邊機曰論兵曰處己曰寓言始條分而件析之無婉詞矣政和元年徽宗間有此書下政典局宣取時了翁坐其子正彙獄徙通州郡移文索之翁遂以表進乞于御前開拆岳亦齋敬止錄云予于了翁通判明州下摘錄宋史而史于明州尊堯集反無此詳覈故又錄程史所錄于此而摘去其後段以非明州事也

周氏四休堂

月湖之西知南雄周鏐以言事忤時相入黨籍作此堂退休

聞志

甬上族望表西湖周氏金紫師厚爲第一南雄鏐第二承奉

四明談助 卷七

銖第三共三望

銀青光祿大夫周公師厚

字敦夫慶歷進士造之子初從學于王鄞江先生皇祐五年舉進士歷荆湖南路轉運判官時役法方行公言四方風俗不同役有勞逸輕重不宜以一慨論朝議是之公好學博覽手錄等身歷仕四十年罔撓權利娶范氏文正公仲淹女聞志公于鄭毅夫榜舉進士名極低只壓得陳傳一名自賦詩曰舉眼不堪觀鄭獬回頭猶得壓陳傳朱定國詩話周師厚爲河北路提舉常平人或呼爲夢見公蓋以其姓周也蒲宗孟爲河北察訪因奏師厚昏不曉事致吏民呼

爲夢公敬志錄



中大夫周公鏐

字廉彥銀青長子也元豐二年進士初調桐江尉慨然曰  
古人學優乃仕辭不赴官益精研六籍及諸子百氏之說  
在京師上書言事同里國子祭酒豐稷給事中范祖禹交  
薦之出知南雄復以言邊事忤時相蔡京名入黨籍因退  
居西湖作四休堂與弟承奉銖盤輿野榜徜徉山水間風  
格宛如晉人紹興元年轉中大夫朝廷方用之而公老矣  
所著文集二十卷尙書右丞相胡公宗愈翰林學士王公  
覲並重其才識相繼以女妻之蔡京作黨人碑舅甥翁壻  
俱在籍中後人以爲盛事焉耆舊傳

周廉彥居月湖西方治舉子業戒香寺啞女屢至其家一

四明談助

卷七

五

日趣裝應舉女大笑作長短句餞行有他年若到南雄驛  
玉石休分徒累卞和泣之句廉彥襲而藏之啞女死爲具  
棺瘞之柳亭後廉彥果知南雄以言邊事忤時相入黨籍  
詳見柳亭維衛塔下

周承奉銖

字初平銀青次子也崇寧二年進士仕至承奉郎未幾卽  
甘休退與兄徜徉山水間賓朋觴詠爲樂嘗于松江作慕  
山溪辭見志陳忠肅公以詩送之有蠶鹽雖不飽心與古  
人期之句復贈以阮郎歸辭史忠定贊曰宦遊寡偶不如  
投閒言之孔易行則維艱公乎勇退雙髻未斑藻月蘋風

誰復追攀

聞志



附驀山溪一首

松陽江上極目烟波渺天際接滄溟到如今東流未了吳  
檣越櫓都是利名人空擾擾知多少只見朱顏老 故園  
應是綠遍池塘草家住十洲西筭隨分生涯自好漁蓑清  
貴休羨謝三郎紅葉月白蘋風何似長安道

周氏裔孫字

字伯圭中大夫十世孫編周氏遺集滎陽外史鄭真書其  
後曰周氏爲吾鄉望族自宋有國以來以科第顯者八人  
而自正議公諱造者始處厚溫厚師厚則造之子也鐸銖  
則造之孫師厚之子也焯則造之五世孫坦則造之六世  
孫也衣冠盛事錄備著父子兄弟之目而預鄉薦者有不

四明談助

卷七

六

盡書亦可謂盛矣師厚卽銀青公鐸卽中大夫銖卽承議  
公也中大夫直亮方正元符上書奮不顧忌名在元祐黨  
籍中宋社旣墟衣冠世緒多就零落而周氏保有三四百  
年詩書之澤有如一日斯足以見忠臣義士之報矣予嘗  
過其家得中大夫鄞江先生集附承議郎所著二十卷及  
銀青公遺文一篇遂得次第輯之而其他有不及見矣惜  
哉周氏裔孫名字字伯圭者去中大夫已十世矣克自飭  
勵讀書爲文有法度自著家乘以傳是所謂能世其家者  
周氏之興信乎未艾也

周知縣致

里居無考

字維遠父以明經貢于鄉早卒維遠少孤出依延慶寺爲



僧工于詩律楊方伯守隅見而奇之時楊公方爲職方因命養髮攜之入京師使從學于堇山李公李公館之得授徒自給業日益進因與寄籍牧馬千戶所補諸生中順天鄉試時都下已知維遠嘗爲僧爭傳其事次年中進士大學士西涯李公聞而撫掌曰此和尚竟得甲科矣出知臨淄縣有異政卒于官民爲立祠初李公旣館維遠復與議婚梁氏女維遠上李公詩曰一從歛袂侍公門復我衣冠助我婚此後有人傳故事卽今無地報深恩一時俱誦之

耆舊傳 周隱君鼎

字伯齡宋中大夫鏐之後明臨淄令致之元孫也好學敦

四明談助

卷七

七

行嗜飲工詩尤精于傳神觀察王公見其貌古儀偉雅相

契洽以禮部儒士兩膺大宗伯薦辟固辭不仕

三補耆舊傳

陳處士居

兩湖之上陳處士之翰讀書處

聞志

遺逸陳公之翰

字憲之殿中丞贈朝散大夫翌之子少有志操三上禮部不第歸求其志居家克盡孝悌家故厚貲好施予鄉人初貸金後攜以償時在汴舟其人給曰金誤墮水公不疑也後數年其人病且死知自悔遣其子來謝致所當償受而不拒徐以所償助其喪葬崇寧二年詔舉遺逸州及部使者薦于朝將官之而卒陳忠肅誌其墓王深寧贊曰貴義



如璧賤金如土不億不信莫予敢侮誠予為善君子所予  
彼晝攫者羞愧汗雨寶慶志

湖語羨急流而勇退耽菴月與蘋風不愧為文正之女壻

忠肅之婦翁兮史忠定菴月蘋風之贊為周銀青師厚作然菴月蘋風實銀青次子承奉作陳忠肅

嘗和之不知忠定何以屬之銀青今志乘又誤移忠定之贊為南雄作未考鄧峯真隱漫錄也南雄大節

同岑之盛甲于黨籍莫之與並况其難弟亦爭勝兮元祐黨籍

范忠宣左丞待制兄弟三人南雄之母舅也胡右丞忠愈王學士觀其再娶婦翁也宗肅則妹壻也忠宣子正平其

中表兄弟也鄧考功忠臣胡氏之僚壻也忠肅之妹嫁西山先生李深親表十人並登高第時稱異事貴義

如璧賤金如土徵君高風足千古兮見了翁所作陳徵士志

梅花壻

趙袁州鉸夫有園在徐侍郎橋東稱梅花壻今世以為鄭丞

四明談助

卷七

相園者謬句餘土首注

徐侍郎橋

在雪汀西畔過橋即五顯靈順廟宋開禧間鄉人徐侍郎守

徽神嘗效靈遂迎歸立廟祀之今廟左有橋亦以徐侍郎名

焉侍郎名雍之鮎埼亭集外編

句餘土音賦湖上故蹟

陳忠肅公南藍一作尊堯書屋

詩話即宋之能仁觀音寺後歸史衛王今之月湖書院

是也

了翁前後尊堯錄老筆完書屬四明忠肅先嘗著合浦尊堯錄不憚意再著四明尊

堯錄始無憾當時稱為四明先生故國黨人餘正氣望藍平楚有餘清瀨風



葉月連郎壻竹嶼花汀和友聲

忠肅妹壻為四休周公居湖上故忠肅亦居湖上觀音禪

寺十洲詩有四館畔剩留指佞草春來依舊綠千莖

### 趙袁州梅花壻

詩話趙閣學彥逾以賞功不遂啓慶元黨禍當與京鏜同罪深寧尚書稱之恐有阿私之失若袁州之清節則真幹蠱之子也

塵甑魚釜擅清芬壻角橫斜有舊紋一洗乃翁鈎黨辱侍郎橋下暗香聞

### 廣盈倉

在月湖之西宋能仁觀音寺址也元時置倉至正間有張用庚碑記明洪武十四年立正廳三間門屋三間倉廩二十五

### 四明談助

### 卷七

九

座每座五間共一百二十五間後漸圯宣德間郡守鄭珞重建廳事并大使副使廨宇及倉廩嘉靖間邑令劉宗仁建預備倉附于內歲久漸廢迨崇禎末年盡圯惟存空址聞張用志

庚倉廩土神祠記見敬止錄

常平倉舊無處所元統二年發下官本中統鈔一百二十一錠四十三兩三錢三分每年照時值糴穀就于廣盈倉收貯

無定額

敬止錄

元時收斂秋糧之際先涓吉啓倉于青龍方廩房入粟六石六斗六升六合以應時各處皆如此取上下四方六合之意

陶南村輟耕錄

元時社倉各都隅每社一所至正元年詔義倉乃民間自藏之粟備凶年缺食之用豐年則驗口而收荒旱則隨



人而給今後每社設立義倉一所提調官設法敦勸敬止錄

### 周觀察第

在今月湖書院右周副使應治自新莊遷居於此

有明宦家門欵前半代俱立石坊上鋪臺盤蓋屋旗杆多  
暨于庭前芍庭錢氏并城中舊家尚有故蹟可證後半朝  
俱建門廳三間露柱旁陳設石獅或石鼓旗杆暨于門外  
湖上故第累然

### 周副使應治

字君衡文穆公應賓族弟也萬歷八年進士歷官湖廣兵  
備副使會楚宗華越之變被傷遂引疾歸著有玉几山房  
集晚居湖上與諸鄉老為林泉雅集名列下

### 四明談助

### 卷七

甬上林泉雅集詩選引耆舊集

萬歷中諸縉紳里居相燕會賦詩名曰林泉雅集尙有洪  
兵部屠襄惠遺風焉今錄其詩得傳者為一卷

光祿寺卿吳公禮嘉 見五鄉碑吳氏本傳

周文穆應賓 傳見新莊舊第下

按察副使周公應治 傳見上

副都御史丁公繼嗣 見普照橋丁氏本傳

叅議林公祖述 見水浮橋林氏本傳

禮部侍郎全公天叙 見月湖全氏本傳

都督僉事萬公邦孚 見新街萬氏本傳

大理寺卿徐公時進 見青石橋徐氏本傳



右中允陳公之龍 見倉基陳氏本傳

同知松江朱公勳 見五岳軒朱氏本傳

趙郎中體仁 見菱池趙氏本傳

周光祿元孚

字初缶副使應治之子以太學生受光祿署丞初聞父有楚難涕泣不下咽微服趨往署中悲喜相聚勸父歸居家雍肅耄年手猶執卷著有霞嶼山房集詳耆舊傳湖上全侍郎

天叙其婦翁也周氏譜

周公子嗣昇

字長孺一字虛舟光祿丞元孚子也少有詩名中年目翳口授不倦兄弟子女姬媵至前者皆令爲書記其詩至萬

四明談助

卷七

上

首有餘大抵皆感懷喪亂之音而王孫之故態名士之風流不以薰萃而減也著有鴉音集三十卷先生爲先贈侍御二何先生之甥二何則楊尚寶次莊之甥而先生之甥爲萬五河管村四世相承宅相不替亦詩人之所少管郵序先生集曰次莊身不及中人老致仕家居病僕背隆隆然方巾布袍狀貌古質二何長身多髯音節宏亮鮮衣高履雄談傾座猶憶吾外王父爲主二先生爲賓諸舅以次侍酒酣笑語予方六七歲行戶外次莊輒抱置膝上賚以果餌摩頂弄之曰此將種也次莊之詩工組練善攷索而以嚴滄浪所論爲宗二何之詩天才橫溢縱筆直書光怪不可逼視其時舅氏最長能以詩與二先生更唱迭和上



下其議論自嬰喪亂相繼坎壈以死舅氏亦病每過外家無復向時賓從之盛而舅氏之集獨日以大乃以四世舅甥之傳令予序之予自惟典核精工不如次莊瑰奇不如二何雅歌鏗鏘不如舅氏四世之傳赧焉莫任且自次莊以至舅氏皆得之家學不相授受山鳴谷應各成其妙所以尤難嗟乎世俗日下一輩親姻相徵逐者服食貨貝而已稍進之不過塲屋舉業之陋求如前輩風味不可復得故予序此集不禁縷縷其言之也管邨之序足以志吾鄉世家盛衰之感沁入心脾爰脩述之

續耆舊傳

葭露閣

周太僕昌晉居湖上所築葭露閣平遠明瑟可觀然其人谿

四明談助

卷七

七

刻爲人所畏與李尚書嵇仲爲隣至不相聞問爲袁晁之讐是則怪矣續耆舊傳詳見新莊本傳故老傳聞嵇仲尚書以不協溫相削籍歸卒時大歛其家將仍用尚書冠服因周太僕入坐廳上不去遂以深衣幅巾入歛恐挾制也

常平義田書院

月湖西明廣盈倉惟存空址 國朝順治十年海道副使王公爾祿于其南偏創建常平義田書院廳事三間輔以兩翼中祀紫陽朱子左祀義莊名宦右祀義莊先賢左右爲厥捐置紳士義田總一百三十畝有奇歲收租穀爲常平出陳易新之本積貯以備災祲兼周節孝與貧士十一年郡守楊公之柄又建義學于廳事之後中爲講堂左右爲書屋延師一



人訓民間之無力從師者聞廣盈倉南偏爲書院其北偏今爲後營教場

義田書院規制記聞蕊泉性道撰

郡城中月湖西曲有爽塏之原三面環水卽古十洲之雪汀也在宋爲能仁觀音寺明初改廣盈園倉迨其季傾圯殆盡鞠爲寒烟蔓草之區今海憲王公肇常平義田倉于四明就其廢址建焉乃以壬辰十二月告土鳩工度其地逼臨大湖曠渺無倚惟稍偏南壤則岸轉砂廻亦淵深涵滙蓋湖之派自它山來者從南門入自大雷來者從西門入兩路溪泉至是襟合于汀之南隅因定以附南而基此擇地定基之概也其制中爲廳事三楹楹各有龕中龕曰義田書院專以奉宋

四明談助

卷七

七

提舉浙東常平公事紫陽朱夫子左龕列祀義田莊名宦其義莊先賢則列祀于右龕每歲例以五月十五日合祀羊豕各一其費取諸倉圃地稅龕之後各設層厨藏祭器及救荒恤貧勸善驗方諸書廳之四壁屬高士陸介社爲畫護以修欖烟雲泉石得坐臥其下檐之前設雕欄十四可以闔闢以爲講習聚會之所後設屏風六由左右屏風而進傑然煥然者太守所創之義學也太守爲誰廣陽楊公也此中廳規制之畧也蔽廳之右翼及軒以間數者五楹有半爲常平委積之廩蔽廳之左翼制如右而以其一楹及半爲收藏社集檯椅及倉中筐篚豆釜之類此左右軒翼規制之畧也由廳而前爲石壇壇之外爲甬道兩旁樹以松柏由甬道而前爲中



門屋凡五楹中爲門門之左右各爲翼翼前後各爲牖戶分  
樹石碑于側此中門及兩翼規制之畧也翼之偏左右各輔  
二廡左者爲守倉僧舍右之偏以前半楹祠土地神而以一  
楹半設普施藥局輔藥局于義倉亦仁術兼行之美也廡之  
外有隙地左蕉右竹蕉之畔有路自軒後直達于義學幽篁  
中爲小門門內卽厥後重墻之間于其西偏別成永懷精舍  
奉王公棠影以識不忘此中門兩廡規制之畧也由中門而  
前爲池池上駕石櫟達外門門爲楹凡三門以內自右循池  
而南于垣間設柴門有地數十畦中亦有池足灌溉自左循  
池而進旁有曲徑芙蓉梧柳映帶左右迂徑而還與中門通  
此外門規制之畧也門之外爲衢衢之外卽湖也渺渺萬碧

四明談助

卷七

十四

遠樹遙岑高下于清波翠靄間虹橋斜鎖雪浪廻環望之真  
蛟宮貝闕焉昔人稱物不及官工不累業役不徒勞事成而  
人不覺爲官府之興造者竊疑爲文具之美爾不圖于今日  
而目覩之且得躬承而親試之也猗與休哉後之覽者煮石  
于月湖之濱耕雲于雪汀之下毋徒視爲一時之繪聲則幸  
甚明山鑑西弟子員聞性道謹記記之日爲六月朔卽經始  
之明年癸巳歲也

全文載于聞志

月湖書院

卽義田書院舊址康熙二十五年李太守煦重建大門中門  
講堂敞樓書舍延義師一人歲以義田租穀爲修脯并修葺  
書院及賑給貧士之用後漸就頽廢雍正五年孫太守詔重



修八年曹太守秉仁重修又新建講堂照廳書舍曹志乾隆三十四年始延請院長掌教事又設監院一員歲支修膳并生童膏火花紅及一切經費鄞縣向有義田一百三十六畝零慈谿縣塗地二千九百七十七畝零每年徵收租錢解府應用錢志書院向有田產租銀歲久侵蝕自乾隆三十三年王太守紹曾到任後清出積弊遂爲修造供給之費錢志失載

芙蓉洲

劉戶部瑄芙蓉洲詩和者王亘 舒亶 陳瓘

翠幄臨流結絳囊多情長伴菊花芳誰憐冷落清秋後能把柔姿獨拒霜

須信金行有智囊會將秋色賽春芳清宵見白休相拒多是

四明談助

卷七

五

潘郎鬢上霜

照水枝枝蜀錦囊年年澤國爲誰芳朱顏自得西風意不管

清秋昨夜霜

紅雲可覓無蜂去渺渺寒波映晚芳未必孤根能耐雪且看秋艷已經霜

謝山十洲志云雪汀之下爲芙蓉洲直至袞繡橋而止近人又有誤以橋北隔河一帶當之者

自雪汀過芙蓉洲水又兩分一由感聖橋入月湖一由馬牙漕底達菱池經三版橋河袞繡橋入月湖芙蓉洲之上爲感聖寺爲常平倉平糴倉爲史丞相府在明爲聞天官第爲李尚書第爲李都督第爲范侍郎第天一閣楊尚書



第黃府尹第至三版橋界河止湖西三洲爲府治第一道

朝沙

感聖橋

感聖橋以在感聖寺南也一名虹橋嘉定間月湖丈尺圖云

感聖橋至碧沚西岸二十四丈九尺

結埼亭集外編

進橋今稱馬衙

漕感聖寺基後爲宋常平倉平糴倉恐卽今中營教場其左爲預備倉永寧西倉故范司馬宅至今猶稱小倉范氏聞志云按宋圖預備倉址故爲史相彌遠府基

常平倉

淳化二年詔置常平倉歲熟增價糴歲歉減價糴用賑貧民本李愷平糴之法其後以沒官田租入或州縣完剩錢米入

四明談助

卷七

六

凡老疾貧丐者圍楛者流徙者率以是濟之隨糴隨支無定

額

寶慶志

義倉

康定二年置凡民戶納正苗米一石卽納義倉米一斗一斗卽納一升本隋社倉之法著令惟許賑給不許他用紹興七年戶部侍郎王俱奏常平六事其二曰封椿義倉斛米故義

倉米牽附常平倉

寶慶志

制置使司平糴倉

州縣各置常平倉所以備水旱採凶荒也然常平置使自端一司州縣發歛皆稟命焉雖河內有饑民不容以便宜從事此制置司所以自矧平糴倉蓋有以也制置知府陳塏有見



於此淳祐二年二月疏聞于朝凡省庫公庫纔有所積卽取撥令項椿管委兩通判端掌此錢爲平糴本末大要欲糴米穀各二萬石度地城西得醋庫餘基不足則買民田給官鑿易隣寺之荒畦凡建屋二十六間曰廳曰泊水曰中門曰大門各三日倉十四分爲六廩以豐年亦有高廩名扁大門曰制置使司平糴之倉四周以墻三面環水前後有水步詳見制置使幹辦公事林元晉所編規約寶慶志

### 史丞相府

月湖之西史丞相彌遠所居按宋遺月湖丈尺圖其府左則袞繡橋今之水仙橋也右則感聖橋今之虹橋也其後直抵影泉坊謂之史府新巷嘉靖志言今爲廣盈倉者誤聞志袞繡

### 四明談助

### 卷七

七

橋亦稱緩帶橋別有史樞密府在天慶觀前洗馬橋東俱見日月湖丈尺圖

### 右丞相史衛王彌遠

字同叔越王浩之子淳熙十四年進士由大理司直改諸王宮大小學教授輪對陳舉薦脩災防邊十三條目丞相京鏜許其功名事業甚遠時金爲北鄙阻鞮等部所擾連歲興兵討伐國勢日弱韓侂胄遂建開邊之議意欲立功固位乃下詔伐金師出無功金人遂分道入寇江表大震彌遠時爲禮部侍郎請誅侂胄楊后與侂胄有怨力贊之遂殺侂胄函其首畀金嘉定元年彌遠以樞密院兼參知政事拜右丞相請復故相趙汝愚及呂祖泰等官召林大



中樓鑰等十五人入朝帝未有儲嗣育太祖十世孫貴和  
為皇子更名竑以沂王嗣子貴誠為秉義郎貴誠燕王德  
昭之後彌遠善相見而奇之時楊后專政彌遠用事久竑  
不能平嘗書后及彌遠事于几上曰彌遠當決配八千里  
彌遠聞之懼帝崩矯詔立貴誠更名昀是為理宗封竑濟  
王湖州人潘壬起兵謀立濟王竑竑討平之彌遠矯詔殺  
竑自是又獨相九年進太師魯國公紹定六年卒贈中書  
令追封衛王諡忠獻宋史

### 史樞密宅之

樞密之父忠獻考樞密左右其父最早寧宗大漸之夕忠  
獻定策禁中得與聞其謀者祇鄭清之與樞密見安晚集及忠

### 四明談助

### 卷七

六

獻為師相一切詔誥詞臣必先呈稿或不愜則令樞密竄  
改陳貧窳坐是辭直院不肯為見吳氏水筆雜抄樞密之長都司

方行履畝之政多用貪暴為耳目文移所及田里騷然或  
以一家之田追及數家湖秀之民歌曰無田一身輕有錢

萬事足

見太學生  
裴楚疏

括浙右虛籍田幾百萬後按其田皆諸

道舊隸始罷徵而田籍不去宋亡民猶以為累見延祐志忠獻

既卒鄭清之陽與相繫而陰排之見黃氏日抄然理宗終以其

父定策之功下詔保全之賜第湖上引入西府且有意相

之會以疾卒見史氏家傳其官三為侍郎四為尚書知平江府

者三知紹興府者再知嘉興隆興各一皆以殿閣學士兼  
安撫發運銜遂由樞密簽書進同知贈太師初諡恭惠改



諡忠清是樞密之大畧也就其生平可採者淳熙四先生之歿廟堂賜諡祇及楊袁沈而未及舒樞密始與本道節使言之令其上請而力贊于朝廣平得諡文靖又回授己子恩澤以與族子見四明文獻其所為文稿亦有時名見家傳

### 史觀文字之

觀文為忠獻愛妾林氏子紹定賜官時年尚少以其婦洪氏不得于林而出之杜範在給舍言朝廷當戒諭史氏弗使醜聲有聞理宗不問見杜丞相集改尚郡主見家傳林氏卒觀

文請恩澤卹典極盛見鄭氏四明文獻賈氏當國惡其諸舅不復

用見王深寺集其官亦三為侍郎四為尚書歷知處嚴溫婺四

州紹興建寧寧國三府奉祀洞霄此觀文之大畧也觀文

### 四明談助

### 卷七

九

頗謙儉不事統綺冬日猶葛幬見延祐志其守括蒼會稽皆有

惠政見後村集後村最惡史氏此言乃公論也國亡杜門養疾

人罕得見見深寧集此皆先正所節取者

以上樞密兄弟事皆鮎埼亭外集文

### 附杜清獻奏畧

杜清獻範在給舍時有奏畧云林氏衛王彌遠之嬖妾也以色而媚其主怙寵以專其家衛王在家醜惡之聲固已彰露今捨潭潭之居挈其癡騃之子而寓于京城紛華之地以身便其私人言藉藉聞者掩鼻洪氏乃宇之林氏妻衛王在時所聘之婦也家室既成已有子女則夫婦之情未嘗睽也一旦以其不孝而欲出其妻使果有不孝之迹



出之固宜而人皆謂洪氏不能合汙同穢而林氏不得淫  
縱自如陛下縱不能以王法正之詎可遂其奸計而許之  
耶宇之迫于其母之命而奪其夫婦之情始處人倫之大  
變此一家之不正耳何至上關聖聽行下都省至形宸命  
使洪氏橫被誣出之罪林氏醜聲益彰彰於天下反以累  
朝廷之令亦至於不正也陛下以林氏爲衛王嬖妾而曲  
徇其情獨不思洪氏爲衛王之婦乎宰臣固衛王之族也  
嵩且不念及此其何以宰天下臣愚欲乞睿斷先寢前命  
訪問其家正其內外主僕之分戒林氏以恩撫婦戒洪氏  
以順事姑戒宇之以義理家使上下和睦醜聲不聞其於  
王政誠非小補

四明談助

卷七

杜氏家乘載範素嗜書史氏以毒藥塗簡冊使人獻範範  
旦夕翻閱毒氣薰目遂失明以死敬止錄

制閫演戲調史相

史丞相用事選人改官多出其門制閫大宴有優扮爲衣  
冠者數輩皆稱爲孔門弟子相與言吾儕皆選人一人出  
曰吾宰予也夫子曰於予與改可謂僥倖其一曰吾顏回  
也夫子曰回也不改謂予曰四科之首而不改汝何爲獨  
改宰予曰吾鑽遂改回何不鑽回曰吾非不鑽奈鑽彌堅  
耳予曰汝之不改宜也何不鑽彌遠乎一座皆失色堅觚集

楊慈湖心非史相

穆陵卽位慈湖以列卿名對上問曰聞師相幼受教於卿



慈湖對曰臣之所以教彌遠者不如此上曰何謂也對曰  
彌遠視其君如奕棋然上默然罷朝以語彌遠對曰臣師  
素有心疾

淮海作詩止伐松

靈隱寺有古松大數十圍與月波亭相對史相彌遠遣人  
伐之寺僧元肇號淮海作詩云大夫去作棟梁材無復清  
陰覆綠苔惆悵月波亭上望夜深惟見鶴歸來

殿帥救觀文府

宋臨安紹定辛卯之火太廟俱灰而史相彌遠府獨全蓋  
殿帥馮時力為撲護耳洪舜俞詩曰殿前將軍猛如虎救  
得汾陽令公府祖宗神靈飛上天可憐九廟成焦土則權

四明談助

卷七

三

臣之威加于天子矣

臨安志

佞人上半間亭詞

史丞相彌遠嘗作半間亭每治事畢即入亭中打坐有佞  
人上糖多令詞大稱其意其詞曰天上摘星班青牛效度  
關幻出蓬萊新院宇花外竹邊山軒冕倘來問人牛閒  
最難算真閒不到人間一半神仙先占取留一半與公閒

湧幢小品

史相詩禁

寶慶初史彌遠專權之際錢唐書肆陳起宗之能詩凡江  
湖詩人皆與之善宗之刊江湖集以售劉潛夫南岳稿與  
焉宗之詩有云秋雨梧桐皇子宅春風楊柳相公橋哀濟







陰魂夜歸

史彌遠死已久一夕其家聞叩門聲曰丞相歸堪家賊匿  
比入門燈驕紛紜升堂即席子婦皆出羅拜訊慰平生歷  
歷囑家事索紙筆題詩云冥路茫茫萬里雲妻孥無復舊  
為羣早知泡影須臾事悔把恩讐抵死分  
西湖志餘

明楊升菴鬼雄詩

寶慶相臣大商賈不販海貨販宋主晝化飛燕啄皇孫夜  
駕老蟾嬪月母四十一年富且融格天偃月將無同老死  
牖下猶未艾生魂歸來稱鬼雄君不見并研諫臣鄧若水  
一疏彈姦澹菴比拾星漏曦非良史續宋綱目者誰子  
彌遠表裡楊后有三思之寵有作樂府詠雲以譏之云往

四明談助

卷七

來與月為儔舒卷和天也蔽敬止錄

聞天官第

月湖之右吏部尚書聞淵所居聞志自虹橋直進馬牙漕臨河  
面南有屋四座俱聞氏之宅後漸次回祿所餘者亦屢經易  
姓改造別有一座在館驛橋東順治初歸於徐御史後人至  
今尚存聞氏之先青州益都人自宋宣和進士實通判明州  
卜居鄞之響巖四世孫時政開慶間自響巖移居石馬塘代  
有隱德莊簡公之祖璋父元璧伯父元奎世居焉傳俱列于  
石馬塘莊簡遷居月湖以後各傳見于下

甬上族望表西湖聞氏尚書諡莊簡一望又叅議澤

吏部尚書聞莊簡公淵



字靜中號石塘贈尚書元璧之子生而莊重不疾趨不苟  
笑弱冠爲諸生時太宰屠襄惠公居里中部使者爲之樹  
表屠公夢一偉丈夫立表下自釋所服授之旦日遇公與  
夢合中宏治乙丑進士授刑部主事時逆瑾擅國嘗折辱  
諸曹不以禮及瑾敗對簿尚不服公執筆數之曰瑾造僞  
符璽私蓄甲兵當大逆瑾遂語塞伏誅楊文襄公一清心  
重公改公吏部郎中嘉靖初進南刑部尚書九廟災公上  
疏自陳張璁擬旨令致仕去上卒留之五年進吏部尚書  
公竊嘆曰使臣得先十年居此官尚可自効今事權去矣  
臣何能爲初夏公言方受眷公間與抵牾及夏坐法而嚴  
嵩獨當軸益橫遂乞身去位卒于家得年八十四贈少保

四明談助

卷七

五

謚莊簡公歷官四十年始終一節有古大臣風而晚年未  
得盡其用天下猶惜焉著有統鈞堂集詳見耆舊傳子思學太

常少卿曾孫世元中書舍人

聞志任子表

尚書生平頗不爲吾鄉士論所重幾幾與慈水趙尚書並  
稱以爲嚴氏之私人至今雖三尺童子皆能道之然考之  
明世廟實錄及野乘則固有不盡然者尚書在朝時不能  
廷評其咎固無可辭而謂其阿附屈節如慈水則無之至  
實錄且言尚書於嚴氏繼多齟齬以此卒去其位然則尚  
書特不能挺身與嚴氏抗而因多不遂其意者非果俯身  
門下者也論世者不可無以別白之

鮪埼亭集外編

參政聞公澤



字美中贈職方元奎之子正德甲戌進士授兵部職方主事武宗欲南巡與同官黃鞏陸震等泣諫罰跪午門五日杖三十世宗卽位錄前諫南巡者陞一級再遷車駕郎中出爲江西布政參議便道歸里卒於家著有充齋集詳耆舊傳

### 閩刑部源

字立中莊簡公從弟嘉靖壬午舉人歷刑部郎中按罪出冤不抑于權勢公林居三十載營月湖中碧沚書屋日與名流詩酒相娛卒年九十有一聞志弟濟嘉靖三十一年貢

士官教諭鄞獻表

### 閩孝子龍

字隱鱗又字仲連冢宰莊簡公孫也甫五歲喪母哭聲感

### 四明談助

### 卷七

五

路人事父定省中禮奉養三十年父歿哀毀過禮所後母病亟乃往爲治後事以產分所後母三女及其外家每祭祀於所後稱爲後男於所生稱爲人後男各盡情禮里中稱爲至行性愛佳山水以父在所出未嘗踰百里唯遊四明山曾過旬日所著詩曰幽貞廬草行藥吟詳耆舊傳子世延世選世銓俱諸生並敦行誼習詩古文世選於崇禎時徐御史之垣保舉薦辟辭不受著勾曲山房集聞志

### 閩孝子繼泰

字治甫孝子龍從弟父賢臣娶陳氏甫五歲而歿陳以青笄育孤形影相弔及繼泰成立娛母備至娶妻甫十日仍侍母寢母病顛天請代至八十六而終臥柩旁者三載供



母像榻前出入必連聲大呼曰娘如是終其身子世麟字瑞寓亦至孝國變後幅巾深衣如故人或危之則曰吾故家子義當然爾

聞志

聞隱君性善

字與同號響巖莊簡公淵之後也蚤棄諸生隱居著述著心伯樓詩文稿二卷輯歷代正史掛一編十卷董封偶錄三十八卷提釐目法十卷

聞志

聞徵君性道

字天廼一字蕊泉叅議澤之後丙戌後與兄性善並棄諸生辛卯翁州之變張相國肯堂死節一門二十七人喬經歷文衣隨征在軍徵君故與之善乃入其軍竟得以三大

四明談助

卷七

美

甕至雪交亭一貯相國骨一貯諸客及僕骨一貯諸姬骨謀葬之而相國故將汝應元自補陀至相與共瘞之茶山康熙戊午許觀察宏勳欲以博學宏詞薦之力辭其後汪令君源澤延修縣志多所攷索援据皆有原本所著書甚富以無後散失僅存環流草堂集數卷論者惜之

續耆聞舊傳

氏詩派自隱鱗先生後如賓王霄虹峻伯皆有盛名在沁泉前今皆無攷見石杜璘友兄弟嗣沁泉而出亦皆散亡吾甬上世家文獻未有如聞氏之散者

傳後論

相傳天廼之

母患疫症而死出殯荒野越七日棺中有兒啼聲族中慈心者破其棺得一小兒卽天廼也

聞園



在馬衙漕底爲聞文學義字孔彰之園湖上名士多于此  
會文園中竹木蕭森綠陰蔽戶在城蘭蕙稱第一書廳不  
甚高而曲折幽邃繞廊多植棕櫚芭蕉最宜雨聲今歸于  
陳太學漢玉建宗祠中藏木主外匝高墻以防暴客無復  
舊觀漢玉之先自慈邑來父敬書饒于貲好行善事嘉慶  
甲戌議賑漢玉遵父遺命慨然以三千金首輸已卯歲濬  
河捐銀踰於衆紳其善行有足稱者

### 李尚書第

月湖虹橋之側禮部尙書李康先所居

聞志

李氏世居孝聞坊至少司空堂建第於大梁街大宗伯康  
先徙居於此卽聞天官第之東廳也族望表并前後諸傳  
俱見於孝聞坊舊第下大宗伯以後傳列於此

### 四明談助

#### 卷七

七

### 禮部尙書李公康先

字嵇仲號金峩侍郎堂之曾孫教授承宗之子萬歷丁未  
進士改庶吉士授檢討以母老病乞終養天啓初服闋起  
左贊善歷遷禮部右侍郎國子監祭酒魏忠賢盜弄威柄  
公奉職居官毅然不移熹宗幸學臨彞倫堂故事司成坐  
講三品以上坐聽忠賢恥於侍立授意鴻臚惟傳講官坐  
公正色曰坐而聽者有祖制鴻臚官何得擅更於是廷臣  
當坐者坐忠賢侍立如故楊忠烈漣之斥罷也方策蹇驢  
出國門臣僚鮮有送者公獨與一二同志挈尊酒餞於郊  
於邑而別其後忠賢以公爲黨人亦斥歸崇禎改元以原



官起用進禮部尚書加宮保內閣溫體仁與公不協尋以磨勘舉子卷削籍歸公貌偉聲揚在講筵音琅琅徹殿陛性恭謹和厚不好立崖岸二子振璣振玘以孝友世其家

耆舊傳

李尚寶振璣

李都事振玘

二公皆宗伯康先之子魯王監國蔭授振璣尚寶丞振玘都督府都事振玘字佩于號穆二幼侍京邸賢奸事迹皆所目擊每衣冠高會追叙兩朝始末聞者以當信史尚寶丞以海上事坐累下獄都事竭所有營救得免家由是落

鬱鬱相繼卒

續耆舊傳

穆二之子志時號印泥性至孝其母劉

四明談助

卷七

天

幾至百歲朝夕奉侍不倦

三補耆舊傳

李明經立櫃

字又泉號雪坪明尚寶司丞振璣之曾孫少以文學名於鄉後遊史雪汀全謝山之門二公稱爲讀書種子學使者翠庭雷公按部至寧雅聞君名試時降體貌與款語揭案署君第一雷公傾倒君甚至而君遇之落落然雷公卒以此愈重君舉君優行貢太學丙子秋君赴省試適雷公以養親告歸君往送是時自督撫以下傾城出餞郡縣吏名刺猶壅遏不及通雷公遙望見君卽降座握手立交衢中語移時鄭重而別見者皆驚顧次日大吏有遣人至寓物色者君已束裝行矣君嘗假謝山讀史通表踰再旬卽還



之謝山訝其速邛以與諸史及萬季野歷代史表異同君  
一一舉似無遺乃大爲歎賞諸百氏書悉能貫串以此名  
噪一時竟以勤苦太過得怔忡疾以卒

樗菴存稿墓志

李尚書第今已改爲徽商江氏宗祠李氏于祠旁別建小  
祠以安先代神主湖上虹橋一帶舊有古柳十餘株李都  
督涵所植也近日芟夷殆盡聞氏舊宅面南江氏建祠改  
轉東門臨大湖垣宇俱倣洋欵裔孫文學紹韓布置池亭  
花柳新植杉檜雜木於祠前爲湖上漆一風景

### 李都督宅

李氏世居砌里至侍御循義之父正華以砌里大宅讓諸弟  
自居東臯別業侍御之子推官生威始居城東之車橋推官

### 四明談助

### 卷七

无

之孫太保樓徙居普照橋提舉櫛之後都督涵徙居於此郎  
聞天官第之西廳也另闢一門西畔有雙桐齋曲徑疏櫺綠  
陰高護涼意洒然古桐一爲大風所折其一尙存李都督以  
前諸傳俱列于車橋舊第都督以下錄于此

### 李都督涵

字敏公耕石老人純之孫夙負奇志不喜爲章句學值三  
藩變起遂仗劍入閩以策干總戎設伏掩賊於江東橋上  
殲擒無算又佐總督姚啓聖平臺灣以功授漳浦遊擊時  
平和方患土寇訛傳有數萬衆薄城制府檄漳州入營兵  
往援都督聞之投袂起曰兵貴神速迅雷不及掩耳亦一  
奇也遽領帳下卒星夜抵平和界銜枚直馳七十里鼓譟



而進賊驚走縛其魁賴立等數十人餘悉縱遣爲良民擢  
提標中軍參將改福州旋題督標中軍副將遇艱哀毀遂  
病不起弟濟字修仁風流儒雅歷遊閩佐叅戎幕曹志

### 李海若先生昌泉

字復琦號海若都督涵之姪少便弓馬雍正初中武舉喜  
填詞援筆立就嘗入京飯逆旅有二孝廉方分韻賦詩見  
海若佩決拾衣短後衣意輕之不爲起海若問所限韻立  
成二詩孝廉大驚揖請署姓名不答卽上馬馳去其豪邁  
如此有雙桐齋集錢志晚年兼工繪事山水人物善用淡色  
精雅絕倫圖後署欵每稱十洲三島散人子恭寓字克干  
號月波諸生晚年兼業醫遷居棟塘有月波詩草

### 四明談助

### 卷七

三

### 隴州牧李君承道

字薪傳父恭寬乾隆庚午舉人官廣東連山令有廉名君  
舉乾隆庚子賢書牧隴州時正值教匪僨張君治之有效  
移治寶雞寶雞爲秦蜀首棧寶雞不安則隴患仍不免君  
至時輕徭役緩催科築堡寨更多練鄉勇從渭河南力禦  
賊之自河北偷渡者賊果淹斃餘衆踉蹌竄去事平將返  
隴民猝聞君去信請之上官仍留君治寶雞又一年復移  
渭南以卓荐引見及返隴而百病交作卒於官行傳弟承蓮  
字宗白乾隆丙午副貢廣東州判後降慶元教諭卒于任

### 李孝子居

端孝李先生景濂之居其族本微後人遷移無定



李孝子景濂字亦周謝山先生作孝子傳并以凱風說示其子侗孝子生四歲喪母踰年其父再娶何氏而父又死家故貧何年十九欲守節而媒氏輩欲奪之孝子潛偵其人於道以錐擊之馳歸母前且拜且哭陳其故母大慟相與奉其父粟主於庭誓相依終身其被錐者亦內愧不敢至孝子自是刻苦勵行事母務得其歡心母性嗜酪孝子日從市中求之雙手端奉歸如鳥舒翼市人怪焉久而訪知之羣爲讓道母病則親滌中幫廁臉七年如一日母家亦貧迎其舅養之有死喪者殯且埋之母歿孝子年已六十尚烏烏作孺子泣於是里中無不稱孝子者端孝蓋其家私諡也孝子自年二十卽棄儒業治醫蓋在丙戌以後

也是時驟遭易代孝子雖年少頗有故國之感但欲屈身奉母而已有醫士孫斐公者故諸生也勸其相從賣藥以奉甘旨孝子欣然從之是則孝子之孝不止於孝者則固無人知之也幼子侗府學諸生敦行有父風與吾同里求爲先人作傳欲諱幼時事殆懼掩太孺人之美而傷先生之心予曰不然人誰無過能改之則聖人不以爲非凱風之詩闡伯詩據孔疏解之謂七子作詩自責其母遂終不嫁予於是歎七子有諭親於道之功而其母亦不失爲賢母不然凱風之詩聖人亦必周旋七子而去之矣其不去也則七子之母固亦名教之所許也矧太孺人之所處固非七子之母所可比事固以從其實爲可信也作凱風



說以示之

結埼亭集

侗之子照書字青藜諸生青藜之子家培

亦諸生

范侍郎第

縣治西南預備倉右巷兵部侍郎范欽所居

聞志

范氏宋丞相

宗尹之後聚居於城西少司馬別建第於此

范訓導訴

字誠甫少司馬欽之祖博覽羣書文尙典雅正德壬申貢

授德興訓導以身表率集諸生於舍而肄之夜循廊察視

燈火旦起課文藝程勤惰以爲常士感激淬礪顯庸者相

繼後卒於官祀之學宮

聞志

范贈公壁

四明談助

卷七

三

字伯瑞少嗜學幾喪明居常篤人倫樂施予表善化慝守

義正身以子欽貴封工部員外郎被服儒素無異平時

聞志

兵部侍郎范公欽

字堯卿號東明嘉靖壬辰進士出知隨州有治行遷工部

員外郎時大工頻起武定侯郭勛爲督勢張甚公以事忤

之勛譖於上下公獄杖之闕下出知袁州相嵩其郡人也

嵩子世蕃欲取宣化公宇公不可世蕃怒欲斥之嵩曰是

抗郭武定者陪之適高其名遂得寢歷遷副都御史巡撫

南贛諸郡擒劇賊李文彪平其穴復攻大盜馮天爵斬之

遷兵部右侍郎解組歸時郡中東沙張公竹墟屠公亦以

事廢與公並里居投閒嘯咏主一時文柄人稱爲東海三



司馬而公築居在月湖深處林木翳然性喜藏書於舍左起天一閣購海內異本列爲四部尤善收說經諸書及先輩詩文集未傳世者與吳門王鳳洲家歲以書目取較各鈔所未見相易故浙東藏書家以范氏天一閣爲第一卒年八十三所著天一閣集撫掌集者舊傳

王元美答范司馬書

節

弇州續編

所諭欲彼此各出書目互補其闕失甚盛心也家舊無藏書目不佞之嗜之頗有所儲蓄二藏外亦不下三萬卷而戊辰後薄宦南北旋置旋失未暇經理今春構一書樓於弇山園度之長夏小間當如命也聞古碑及抄本毋踰於鄴架者若家所有宋梓及書畫名蹟庶足供遊目耳

四明談助

卷七

七

范吏部光文

字潞公司馬欽之曾孫順治己丑進士授禮部主事主陝西鄉試遷吏部文選司嘗值諸曹乏人兼署四司事剖決精敏案無留牘初爲儀部時同里董文和母妻子女並沒入旗下行乞於途公竭蹶貸金贖歸里人高其義天一閣藏書甲於浙東公復購所未備增儲之黃梨洲至甬上公導之登閣讀所未見書一時稱其不愧世家風流云

續者舊傳

范德化正輅

字載瞻銓部光文從子康熙五年舉人初就秀水教諭時官嘉興府學訓導者卽其父恩貢生光燮公餘之暇趨庭歡甚尋陞泉州德化縣攝篆大田巡撫以其莅泉久咨及



一方利病遂條議十事以進檄下閩屬遵行之子從益以  
明經爲桂林通判從夔康熙己卯舉人曹志從夔子永恒雍  
正間副貢永恒子懋梁邑廩生未貢卒從益孫懋柱字漢  
衡邑廩生能珍藏書籍爲高宗皇帝所知欽賜圖籍  
并御製詩舉世榮之子灼字見三郡廩生早卒

### 天一閣

閣在范侍郎宅之東偏左瞰月湖爲浙東藏書家第一舊有  
張東沙豐南寓二記康熙己未侍郎元孫廷輔請于姚江黃  
梨洲復爲之記曹志黃梨洲記見錢志

天一閣藏書記畧

鮑琦亭集

南雷黃先生記天一閣書目自數生平所見四庫落落如置

### 四明談助

#### 卷七

高

諸掌予更何以益之但是肇始於明嘉靖間而閣中之書不  
自嘉靖始固城西豐氏萬卷樓舊物也豐氏自清敏公後代  
有聞人故其聚書之多亦莫與比迨道生晚得心疾喪失其  
家殆盡而樓上之書又遭大火所存無幾范侍郎欽素好購  
書先時嘗從道生鈔書且求其作藏書記至是以其幸存之  
餘歸於是閣又從弇州互鈔以增益之雖未能復豐氏之舊  
然亦雄視浙東焉吾聞侍郎二子方析產時以爲書不可分  
乃別出萬金欲書者受書否則受金其次子欣然受金而去  
今金已盡而書尚存其優劣何如也自易代以來亦稍有闕  
佚然猶存其十之八四方好事時來借鈔聞人林佶嘗見其  
目而歎其不博不知是固豐氏之餘耳且以吾所聞林佶之



博亦僅矣

前半篇詳豐氏聚書始末節入城西豐氏下

天一閣碑目記畧

鮑琦亭朱

天一閣書目所載者祇雕本寫本耳予之登是閣者最數其架之塵封衫袖所拂拭者多矣獨有一架范氏未嘗發視詢之乃碑也予清而出之其拓本皆散亂未及裝爲軸如棼絲之難理予訂之爲目一通附於其書目之後金石之學別爲一家古人之嗜之者謂其殘編斷簡亦有足以補史氏之闕故宋之歐劉曾趙洪王著書哀然近則顧先生亭林朱先生竹垞尤其最也侍郎之喜金石蓋亦猶豐氏之餘風但豐氏石刻有爲世間所絕無者如唐秘書賀公章草孝經千字文是也而今不可復見惜矣侍郎所得雖少邈然手自題籤并

四明談助

卷七

記其所得之歲月其風韻如此閣之初建也鑿一池於其下環植竹木然尙未署名也及搜碑版忽得吳道士龍虎山天一池石刻元揭文安公所書而有訛於其陰大喜以爲適與是閣鑿池之意相合因卽以名閣惜乎鼠傷蟲蝕幾十之五吾聞亭林先生之出遊窮村絕谷皆求碑碣而觀之竹垞亦然今不煩搜索坐擁古懽而乃聽其日墜月腐於封閉之中良可惜也予方放廢湖山無以消日力挾筆研來閣中檢閱欸識偶有所記亦足慰孤另焉而友人錢唐丁敬身精於金石之學者也聞而喜亟令予卒業乃先爲記以貽之

尊藏

御製書籍

古今圖書集成一部

乾隆三十九年賜藏



西域得勝圖三十二幅 乾隆四十四年賜藏

金川得勝圖十二幅 乾隆五十二年賜藏

圖書集成一萬卷凡例四十七條 聖祖仁皇帝纂定雍正

四年九月二十七日 世宗憲皇帝御製序一篇列於卷首

全書部目開後

歷象彙編

乾象典二十一部 一百卷 歲功典四十三部 一百十六卷

歷法典六部 一百四十卷 庶徵典五十部 一百十八卷

方輿彙編

坤輿典二十一部 一百四十卷 職方典二百二十三部 一千

五百四十四卷 山川典四百一部 三百二十卷 邊裔典五百四

四明談助 卷七

十二部 一百四十卷

彙

明倫彙編

皇極典三十一部 三百卷 宮闈典十五部 一百四十卷 官

常典六十五部 八百卷 家範典三十一部 一百十六卷 交

誼典三十七部 一百二十卷 氏族典二千六百九十四部

六百十四卷 人事典九十七部 一百二十卷 閨媛典十七部

三百七十六卷

博物彙編

藝術典四十三部 八百二十四卷 神異典七十部 三百二十卷

禽蟲典三百七部 一百九十二卷 草木典七百部 三百二十卷

理學彙編



經籍典六十六部

卷五百

學行典九十六部

卷三百

文

學典四十九部

二百六十卷

字學典二十四部

一百六十卷

經濟彙編

選舉典二十九部

一百三十六卷

銓衡典十二部

一百二十卷

食貨典八十三部

三百六十卷

禮儀典七十部

三百四十八卷

樂律典四十六部

一百三十六卷

戎政典三十部

三百卷

祥

刑典三十六部

一百八十卷

考功典一百五十四部

二百五十卷

以上六彙編三十二典六千一百九部共一萬卷

上諭一道問天一閣藏書房屋書架造作款式

乾隆三十九年六月二十四日奉

上諭浙江寧波范懋

四明談助

卷七

七

柱家所進之書最多因加恩賞給古今圖書集成一部以示嘉獎聞其家藏書處曰天一閣純用磚甃不畏火燭自前明相傳至今並無損壞甚精著傳諭寅著親往該處看其房閣製造之法若何是否專用磚石不用木植并其書架款式若何詳細詢察燙具準樣開明丈尺呈覽寅著未到其家之前可預邀范懋柱與之相見告以奉旨因聞其家藏書房屋書架造作甚佳留傳經久今辦四庫全書卷帙浩繁欲倣其藏書之法以垂久遠故今我親自看明具樣呈覽爾可同我前往指說如此明白宣諭使其曉然於心勿稍驚疑方為妥協將此傳諭知之仍著即行奏覆御製詩題范懋柱所進書簡端仍給還本家今尊藏於天一



閣

題魏了翁周易要義

華父師敬子其學傳紫陽紫陽注周易獨稱卜筮方舉占  
意有謂恐人涉荒唐魏乃宗正義刪繁取其臧釋文攷陸  
氏兼引馬鄭王簡以得其要約而頗致詳彞尊尚勿知希  
寶誠吉光開宗闢虛元孔門教用彰三易明周稱蓋謂取  
岐京乾健具四德坤順惟隨倡弗牛而曰馬牝馬行克疆  
然予更思之仍卽一乾剛乾坤分既定餘卦推類明大端  
弗失正十翼臣之良出處益卓然正色立朝綱豈徒托空  
言用易誠有常四庫廣搜羅懋柱出珍藏鈔刻俾歸之牖  
世文教昌卷首題五言用賁世守長

四明談助

卷七

天

題馬總意林

集錄裁成庾穎川意林三軸用茲傳漫嫌撮要失備載嘗  
鼎一臠知味全

都護安南政不頗用儒術致政平和奇書五卷銅柱二無  
忝祖爲馬伏波

六經萬古示綱常諸子何妨取所長節度豈徒務佔畢要  
知制事有良方

御製題袁燮絜齋集六韻

學爲君子儒體用亦相符性悟雖宗陸身名未異朱

燮師事陸

九淵得其指授具有原本又少以名節自期立朝屢進讜  
言所至政績皆可紀在南宋諸儒中可謂學有體用者具  
詳宋史邊情言頗悉民務政多殊

集中劄子幾及三十首  
其料敵論邊深得要領



而陳民務述治要亦切實可見施行向惟散見永樂大典  
中今爲哀集得廿四卷雖未必能盡還原書之舊亦可存  
十之六七因命刊刻以廣流傳大典昔割玉哀編今合珠虛車祛藻繪實  
地有工夫傳世因在此詩文餘事乎

### 楊尚書第

縣治西南三版橋工部尚書楊守隨所居聞楊氏世居鏡川  
吏部尚書守趾別建第於探蓮橋太僕卿美益建第于桂芳  
橋康簡公建第於此傳詳各居第下

據張東沙府誌楊康簡公宅在縣西二里青石橋張去楊  
時未遠恐張說爲是又聞楊族後人云三版橋係楊廉使

### 茂仁宅

工部尚書楊康簡公守隨

### 四明談助

### 卷七

三

字維貞號貞菴栖芸先生範之孫文懿公守陳從弟也成  
化丙戌進士授監察御史出按江西有大猾李孜省者以  
事誣公斥守南寧宏治初遷應天府尹以治守備太監蔣  
琮罪反爲所噬謫廣西叅政七年不調已而歷遷至大理  
寺卿進工部尚書正德初巨璫劉瑾等在上左右日擅政  
公請治瑾等罪得旨處分瑾積銜入骨遂傳旨勒公致仕  
卽日乘小車就道瑾怒不已矯詔罰出米千石輸邊削奪  
官職瑾伏誅復公原官公竟不復出惟與里中高年結爲  
耆會幅巾緜履日徜徉山水間身敦禮義爲士族法得年  
八十有五卒詔贈太子少保諡康簡詳見耆舊傳子茂恕都督

### 經歷

聞志任子表



黃府尹第

縣治西南三版橋應天府尹黃景章所居聞志唐刺史晟之後自鄆塘鄉之張黃徙居于五臺寺左小司空景章復建第于此第左卽三版橋河對河為王尚書第

工部侍郎黃公景章

字唐叔號玉陽對峯公六子性孝友篤學力行以博洽聞萬歷丁未成進士授山東濟南府平原令值旱蝗設法賑救崇禎戊辰歷陞應天府尹時逆璫魏忠賢勢熾甚公力敦風節不少屈一日以私書脅之公怒甚適飲茗擲甌于地視之得不碎公曰是可瓦全遂以病乞歸里居十餘年以壽終贈南京工部侍郎所著有平原縣志問水贅言子

四明談助

卷七

早

嘉瑜詹事府主簿

採家傳

月湖西岸之三洲為府治第一條朝沙自烟嶼而雪汀芙蓉洲至三版橋界河止



四明談助卷十八

月湖十洲西岸之三址所稱烟嶼雪汀芙蓉洲者已錄于前  
茲再錄中央四址于後

松島

劉戶部理松島詩 和者 王亘 舒亶 陳瓘

恥隨楊柳嬌春色厭近芙蓉遞暗香直幹凌霜終偃蹇願爲  
一柱壯明堂

誰陪老碧到秋霜賴有黃花隔水香土淺波深難獨立可能  
移植向公堂

亭亭古幹對滄浪雨洗風飄老吹香晚歲何人同寂寞水西  
我有讀書堂

四明談助 卷六

影參岸柏童童綠葉蔽汀蘭澹澹香斤斧不來人迹遠養成  
千尺勢堂堂

明王右仲 嗣爽 鑑湖松島歌

賀監祠前晚風發千頃湖光一輪月湖月從來缺復圓湖風  
只管催華髮松島空存舊日名蒼龍化去秋冥冥兔絲已斷  
不可續何人斲得千年苓高朋滿座酒滿瓶狂歌對酒君請  
聽乾坤莽蕩定誰主向來無我亦無汝與君寬作百年期此  
後相逢不敢許勸君擊筑我吹竽有酒不飲復何須一時浮  
名幾冰炭九原朽骨無賢愚飄然願逐赤松去不識赤松今  
有無只有松間古時月曾照幽人據高梧

謝山西湖十洲志云舒亶松島詩曰歲晚何人同寂寞水西



我有讀書堂舒之懶堂在輿底而松島在東則真隱觀乃松島自史氏築觀後始改名竹洲張瑤芝遂疑為竹嶼者謬也自烟嶼絕湖而東為松島其分水南從南城下入日湖北過湖心西橋憧憧西橋繞碧沚菴後入平橋河松島之上為樓公講舍為錦照堂為王氏畫錦堂為史氏真隱觀為四明洞天為謝遺塵廟為史少師宅為竹洲三先生書院為晏公廟在明為陸康僖公祠為全氏別墅為胡緱山隱居等蹟

### 正議樓公講舍

竹洲先為正議樓公

郁

講舍正議之孫墨莊所建畫錦堂紫

翠亭皆在焉後歸史越王遂稱洞天

勾餘土音詩話

### 四明談助

#### 卷六

二

湖語云慶歷之師儒五而樓氏居其一實自剡源來敷教澤

豐袁之源流所自集兮

樓正議公來城南學者稱為西湖先生高弟則豐尚書袁光祿其最

光尚書古之遺直托興荷花奸回辟易正色立朝田不盈陌

以視清獻允不忒兮

豐清敏公

### 錦照堂

西湖舊有十洲三島之勝最南一洲與樓氏故廬密邇樓楚公异守鄉郡築錦照堂懷綬軒刻祐陵御製其上中燬于兵隆興初趙子瀟知郡復新之更名竹洲久而寢壞宣獻執政日請以私錢自葺之求奎書錦照東宮書懷綬以為賜繫齋集政和中樓楚公守郡五年所居號畫錦坊南門內有錦照橋與正堂相直宅之後有錦照堂宅之左有堂曰繼綉以繼王



之後也

寶慶志

湖語云前王後樓畫錦之府雙闕相仍羣公之祖

樓楚公畫錦堂乃王

司封周之故址四明守鄉郡者自王始

餘光瑩瑩環橋如組

畫錦坊在西湖之南首其東有錦照

橋則南湖之交也其西有錦照堂則竹洲也堂與橋相隔遠成化志卽以竹洲之橋當之不考延祐志故也

畫錦堂王氏

知縣王公文亮

子周典鄉郡

字昭遠奉化人嘗渡浙江有遺白金百勛於舟者公獲之

留三日俟失者至歸之而去不告以名仕至龍川令子周

登進士嘗典鄉郡

曹寶慶志云慶厓中以司封郎中守郡

真隱觀

在月湖竹洲宋丞相史忠定讀書之所忠定自號真隱乾道

四明談助

卷六

中嘗御書真隱二字賜之後遂爲觀

至正續志明

改爲陸康僖公

祠

嘉靖志

今觀已久廢陸祠移於水西錦里橋之北

竹洲

西湖十洲志云自史氏築真隱館後松島始改名竹洲月湖

丈尺圖云南城下至竹洲五十一丈竹洲取湖心寺前三十

八丈八尺

四明洞天

史忠定以竹洲之真隱觀爲洞天摹四明九題於其中因立

謝遺塵廟其御賜四明洞天四字藏宸奎閣

湖語注

史忠定次韻陸務觀遊四明洞天詩

風烟偶爾屬吾邦箇箇松筠聳碧幢奎畫百函龍作衛雲岑

此竹以物子



四面石爲窻水邊自喜陪振鷺籬外從渠有吠厖多謝故人  
迂五馬清談別盡幾銀缸

真隱觀洞天古蹟記

鮎埼亭集外編

史氏先世本居月湖之上忠定曾祖冀公爲明州吏奉其母  
至孝嘗揮金治具挽舟遊湖中而大吏者俗人也聞之恚其  
不告摧辱之冀公坐是拂鬱以天其夫人葉氏卽守節訓子  
者也

見忠定葬五世祖招魂詞中

忠定之爲翰林學士也嘗自署鄮峯真

隱高宗因御書以賜之已而入相丐閒孝宗問曰師相真隱  
之區已告成乎對曰未也孝宗曰然則朕當成師相之志卽  
賜月湖竹洲一曲而詔臨安府以萬金爲治觀瀕行光宗在  
東宮大書四明洞天四字賜之先是忠定嘗登四明山入雪

四明談助

卷六

四

竇出杖錫求所謂洞天故址不可得至是因光宗之書累石  
爲山引泉爲池取皮陸四明九咏彷彿其亭榭動植之形容  
而肖之於是觀中遂有四明諸勝觀之左建寶奎閣以貯兩  
宮御書又建祠以禮四明山王及謝高士遺塵之像又造划  
船于湖中以修競渡故事又割觀之右爲精舍以居沈端憲  
公而湖上之以洞天稱自此始當是時忠定以甘盤舊學致  
政家居冠蓋駢集而觀中林泉極盛忠定愛之甚其詩餘中  
爲觀作者凡數十首而陸放翁來訪爲賦四明洞天詩忠定  
和之其和鄭郎中輩賦九題者再皆觀中之九題而非四明  
山中真境也樓攻媿詩曰相家小有四明山謂洞天也於是  
忠定仲子忠宣於觀之西築宅袞繡坊冢孫子仁於觀之東







承平之餘風所謂廟堂鐘呂之音也

又云予搜求前輩文獻於永樂大典中鈔得文惠忠定初謚周禮

論語二種彌大樸語二篇又於天一閣得文惠漫錄其餘未

能盡也序稱文惠為魏王按宋史文惠封魏公贈越王恐序

誤也

句餘土音賦史忠定公洞天

乾淳丞相老甘盤歸來別署真隱仙臨行稽首香案前乞得

御書光洞天洞天在湖不在山但教心遠地自偏丞相事業

卓可傳老成持議國脈延胡乃心為謝老懸欲移南雷置平

泉中摹九題互錯連竹洲之水清且漣丹山儼在杖屨間謝

老香火如雲烟護以寶墨星芒寒忠定特為遺塵立祠湖上而寶奎廟其宸翰所貯也

四明談助

卷六

六

阿誰接武皮陸篇厥有張鄭皆傑然張武子鄭中卿也况有大儒開

雙筵沈端憲煥及弟炳明招宿老相周旋呂忠公祖儉固宜世澤長綿綿

同叔彌遠子申嵩之之雖負愆不掩滄洲諸子賢洞天長愛蘭芽妍

逝水匆匆六百年空餘湖光映畫船清容募疏誰見憐謂募修真

隱觀白齋詩句且莫箋明人無舉洞天故事者惟張白齋詩中一及之陸祠晏廟迭

相延陸康傳公建祠其地旁又為晏公廟先公先疇亦累遷世家喬木良難言

先宮詹公得是洲欲復九題之勝而不克國難後歸他氏今予僅復其半

謝遺塵廟

史忠定宅在湖東以湖中竹洲之真隱觀為洞天摹四明九

題因立謝遺塵廟于其中至所稱惠濟王祠宸奎閣花果園

實跨湖而東皆洞天之所包也見後寶奎廟記



湖語誰移洞天跨湖為藪曰惟史氏十據其九招四明之山

靈使來歸于戶牖兼天巧兮人工笑愚公其何有彼從孫之

摹補陀于霞嶼其法蓋有所受宸奎有藏遺塵有像惠濟有

祠環共相向史忠定以真隱觀為洞天摹四明之九題于其

中因立謝遺塵廟其御賜四明洞天四字藏宸

奎閣又立惠濟王祠祀之忠定從孫巖之摹補陀洞天于東

湖之霞嶼實祖于此今史氏子孫誤以霞嶼為忠獻所鑿

至今花果之神居如靈光之無恙噲圖經之譌謬乃以為建

炎之杜將今花果園廟亦屬史氏別業中物嘉靖忠宜在北

鴻禧在東繡衣長橋碧沚芳叢報慈禪窟忠獻所通錢康憲

為觀音禪寺初名報慈史忠獻請得之四世綿亘萬屋爭雄

乃有放翁之徒彩筆如虹更有石窻王孫山澤臞臞括蒼歸

來小卜逃虛史使君文卿築山澤居蓋石室

四明談助 卷六 七

沈端憲居竹洲

湖語云四先生之講堂俱在湖上而竹洲一曲為端憲之幽

居晝觀妻子夜省夢寐書帶之巾遍階除也皎皎季子高臥

邱樊道義之樂長冲閒也沈端憲公以史忠定割宅居竹洲

氏兄弟並居湖上直閣沈端憲公煥

字叔晦自定海徙鄞始入太學與臨川陸象山九齡為友

一日盡舍所學以師禮事焉務本趨實不自矜銜乾道五

年舉進士會充殿試考官唱名序立階下帝偉其儀觀遣

內侍問姓名衆滋忌之或勸其姑營職道未可行也公曰

道與職有二乎後充幹辦浙東安撫使公事適治高宗山



陵百司供給不暇公亟言于安撫使支費頓減改舒州通判拳拳然以母老爲念以善類凋零爲憂卒公人品高明而不苟自恕常曰晝觀諸妻子夜卜諸夢寐兩者無媿始可以言學追贈直華文閣特謚端憲延祐志四明文獻誌李堇山贊曰正色立朝以道舉職肅然師模以嚴啓迪反觀內省慎獨之功端憲追謚允符德容今皂莢廟前沈氏其後裔也

沈徵君炳

字季文端憲之弟年未四十棄去場屋師陸象山務窮性理之學樞密趙汝愚以遺逸舉之丞相史浩使子弟師之固窮終其身寶慶志

四明談助

卷六

端憲公大父予霖貢辟雍調惠州博羅主簿無仕進意號逍遙翁父銖任承務郎鎮東節度判官以明經爲鄉里師嘗問道於焦先生公路義方之訓尤嚴故諸子皆以學行

顯寶慶志

呂忠公泛棹訪學

呂忠公監苗米倉署在城東每訪端憲昆仲泛棹湖上入竹洲講堂討論竟日見後竹洲書院記

監倉呂大愚先生祖儉

字子約號大愚婺州金華人東萊先生弟也淳熙九年監

明州苗米倉郡中楊慈湖簡

袁絜齋燮

沈叔晦煥

舒元質

隣

各開講院稱四先生慈湖在碧沚絜齋在城南之樓氏



精舍叔晦在竹洲惟元質時以宦遊遠出大愚之來于諸講院無日不會甬上學者遂以呂代舒亦稱四先生滕德粹麟爲鄞尉朱徽公語之曰彼中有楊袁沈呂可與語也子喬年沈叔晦壻能守家學孫寶之定居于鄞九靈山房集

史少師宅

在月湖東史少師彌大之宅俗稱前府嘉靖志

史少師彌大

字方叔忠定之長子力學勵行登乾道五年進士淳熙間累遷秘書丞每輪對帝稱善後奉祠歸紹熙間進禮部侍郎諡獻文聞志

史朝奉守之

四明談助

卷六

字子仁忠定長孫也方叔之子心非叔父同叔所爲主管紹興府千秋鴻禧觀中年避勢遠嫌退居月湖之松島著升聞錄以寓規諫詔書累起之力辭不赴杜門講學又學古文於樓攻媿同叔每有所爲必曰弗使十二郎知否寧宗御書碧泚二字賜之斯則僅見於清河書畫舫及史氏家傳而已鮎埼亭外集子仁有宅在松島別業在碧泚傳互見碧泚別業湖語云辛陽之碧梧翠竹宗袞所不能屈講學之功斯爲卓越史忠宣不屈其兄鴻禧不屈其叔皆從慈湖先生講學湖上謝山又云甬上賜府尚有流傳一二者如史文惠王之壽樂以位望也文惠之孫子仁以避其宗袞官不達而亦賜鴻禧之名則以賢也



竹洲三先生書院記

鮎埼亭集

竹洲在鄞西湖之南蓋十洲之一三先生者沈端憲公暨其弟徵君季文叅之以金華呂忠公也史忠定王歸老御賜竹洲一曲壽皇爲書四明洞天之闕以題之卽所稱真隱觀者也忠定最與端憲厚故割宅以居之而徵君亦授徒于忠定觀中于是端憲兄弟並居湖上其時忠公方爲吾鄉監倉欲昕夕與端憲兄弟晤顧其公署在城東不時往還甚勞有船塲官王季和者忠公友也曰是易耳乃以塲木爲製船每忠公興至輒泛棹直至湖上端憲從水閣望見之輒呼徵君曰大愚來矣相與出俟於岸上或竟入講堂討論終日或同泛湖上忠公爲詩以記之曰湖光拍

四明談助

卷六

十

天浮竹洲隱然一亩城之幽中有高士披素裘我欲從之恐淹留探囊百金辦扁舟又煩我友着意修微風一動生波頭飛棹來往倦則休是也方端憲遊明招山中忠公之兄成公尚無恙相與極辨古今以求周覽博攷之益及其家居忠公又官於鄞切磋倍篤故沈氏之學實兼得明招一派而世罕知之者夫以相府之巍峩宸奎之焜燿而後世之流連而不能自己者乃在三先生之隱約是可知良貴之別有所在也然忠定能以綠野之堂爲諸賢永朝夕則書院之長存卽洞天之佳話矣先宮詹之得竹洲也擬爲端憲築書院而未成其後竹洲累易主而復歸于予乃遂事焉而記之



胡縵山隱居竹洲

胡布衣奇佐字襄哉一字縵山居湖上史文惠

浩初

王園旁

受詩法於宗丈正菴僅年三十卒布衣為人落落古道友朋

羣居有失言卽面規之勵志于聖賢之學市井小兒皆呼爲

長者惜未見其止臨卒出友人所寄金致其子其生死之際

不苟如此有詩一卷又有縵山且筆

續耆舊傳

附胡布衣奇佐老兵行

長春門東一老兵短褐駟羊淚頻滴傍人借問何事悲口未

發言成嗚咽名注河南世家譜因遭流寇充行伍聖朝開國

海氣迷逐隊南征不辭苦親知把袂惟頃刻數聲鼓角催人

別將軍令嚴攻守頻從此無心念家室我來茲地年正芳鐵

四明談助

卷六

七

甲銀鎗駿馬郎趨距投石渾閒事爭先赴陣如貪狼從軍廿

載無消息月夕花朝歸思積只道太平有日歸不料太平歸

不得太平於今十六年軍容歷久頗索然百日纔頒五斗米

秋來方散夏時錢况我七十人非昔強弓勁弩開無力老驥

難分伏櫪恩牧養羣羊度朝夕屈指同行舊日交大半已作

溝中瘠雖餘殘喘及今存回首難禁泪漉漉我聞此語殊可

矜誰向天衢達此情願言長茲歌晏清

晏公廟

在月湖竹洲宋丞相史浩建真隱觀於此元季廢

成化

竹洲

晏公廟後爲陸康僖公祠陸氏復歸於全氏今又易姓爲菜

圃已成停柩場矣



竹洲晏尚書廟碑記畧

鮎埼亭集

吾縣六鄉世家右姓其爲南宋寓公之後甚多吏部尙書晏公敦復亦當時寓公之一尚書晚年以忤權臣悒悒而死太夫人尚在堂汪莊靖之父太府公時時周恤其窮語在史丞相所作大府行狀今吾鄉不聞有晏氏蓋其後卒歸西江歟吾鄉湖上之竹洲東望爲友恭堂故址卽汪大府所居也大府亦以忤權臣被斥蓋尚書之同志湖光明瑟先正之魂魄相與共處招邀過之薑桂之風裁旁皇乎其可接焉  
附寓公晏尚書傳

晏公敦復字景初撫州臨川人程伊川先生弟子也仕至吏部侍郎權尚書以忤秦檜出知衢州奉祠旣退閒來寓于鄞

四明談助

卷六

十三

宋史

全氏別墅

竹洲真隱觀基歸陸氏後復歸於全氏宮詹公旋里構平淡齋於洲東構菘臆於洲南復于城下築桃花隄以助竹洲之勝別墅未落宮詹下世詳見前桃花隄記湖東爲陸孝廉扃花園與全氏別墅相望

重建謝高士祠

真隱觀中舊有謝遺塵祠至觀圯而祠亦廢全宮詹公旣得竹洲思復九題之勝而不克度常謝山先生於菜園中先爲小屋三間以奉遺塵將欲承先志也

謝高士祠堂碑記

畧

鮎埼亭集外編



四明洞天之勝自謝高士遺塵著而山中未有遺塵辦香之地南宋時史丞相直翁歸老湖上營真隱觀於竹洲卽摹九題之勝於觀中而請御書洞天之額以寵之乃特立遺塵之祠遺塵未嘗居湖上然旣摹九題則祠之亦所不容已者也顧自真隱觀旣圯而祠亦廢予讀直翁集始得其概惟竹洲之歸于先宮詹公嘗欲復九題之勝而不克易主之後遂爲菜園今竹洲復歸於予予力不特不足望直翁并不足望先宮詹公而欲以漸振之乃先爲小屋三間以奉遺塵蓋祠存而九題之勝可遡也夫遺塵固世外寂寞人也以直翁之平泉而爲之祠廣廈高軒珠簾翠幙或未必當山澤臞之意今以予之窮擷蒼萎薦昌陽反足增湖上一佳話也

四明談助 卷六

花嶼

劉戶部瑄花嶼詩 和者 王巨 舒亶 陳瓘

淺深艷冶一枝枝帶露臨風不自持水上紅雲真縹緲多才却憶退之詩

傳聞春入水邊枝懊惱行人不暇持任是杜陵歸較晚也須排悶強裁詩

暖吹紅紫上青枝掠水風烟巧自持蜂蝶鷓鴣各芳意錦囊消得探春詩

紅紫商量欲滿枝探春觴豆好攜持便須載酒凌雲去底事黃堂獨賦詩

謝山西湖十洲志云舒亶十洲閣記曰因湖上之積土廣爲



十洲而敞壽聖之閣以名之是十洲閣在壽聖院中王巨題閣詩曰山川如幻閣長秋一島飛來伴九洲是壽聖院爲十洲首卽花嶼也前輩張瑤芝以爲芙蓉洲謬已

自松島過花嶼其分水東從裏湖湖心東橋憧憧東橋經碧沚庵左入平橋河西從外湖湖心西橋憧憧西橋繞碧沚庵後入平橋河花嶼之上爲湖心寺十洲閣澄輝閣滄洲閣袁忠臣祠在明爲張氏月湖精舍寶綸堂今爲月湖菴等蹟

### 湖心廣福寺

在西湖之心舊號水陸冥道院俗謂湖心寺宋治平中建熙寧元年改壽聖院紹興三十二年以犯太上皇尊號改今額

### 四明談助

### 卷六

十四

係十方傳律講法處充祝聖壽爲放生池道場延祐志宋時月湖丈尺圖云湖心寺後至逸老堂一十九丈五尺

### 曾鞏遊壽聖院詩

一峯瀟灑背城陰碧瓦新堂布地金花落禪衣松砌冷日臨經帙紙窻深幽栖鳥得林中樂燕坐人存世外心應似白蓮香火社不妨籃輦客追尋

### 陳瓘次韻袁朝請陪太守遊湖心寺詩

塵境紛紛俗慮增故尋幽徑訪南能湖波浩渺無窮綠寺屋高低不計層詩老新吟工惱客使君餘暇得陪僧棋中得失何時了一局輸贏未可憑

### 黃潛湖心寺



蕭蕭涼月滿池臺水檻風櫺四面開一柱殘燈何熠煜半檐  
衰柳故崔嵬謬持微祿知無補未謝餘緣得再來塵土馬蹄  
何日了可容良夜廢啣杯

敬止錄云舒亶有詩二首其人難與三公並不錄

### 十洲閣

元祐八年劉純父理守是邦浚西湖增卑培薄環植松柳復  
因其積土廣爲十洲而敝壽聖之閣以其名名之蓋四時之  
景物具焉

舒信道  
西湖記

### 王亶十洲閣詩

山川如幻閣長秋一鳥飛來伴九洲不礙漁樵雙槩過何妨  
羅綺四時遊雲疑泰華分張去水憶蓬瀛散漫浮禁苑未知

### 四明談助

### 卷六

五

湖海樂生綃寫取獻中州

舒信道

亶和

綠玉手持尋五岳正應未識海邊洲倚闌花木參差見對岸  
笙歌次第游烟霽多疑九峯曉波平全勝六鰲浮仙風坐隔  
紅塵路消得丹青詫北州

### 明沈嘉則十洲閣詩

高閣俯平流居然舊十洲西連天姥關東控大瀛浮風雨三  
山動乾坤一鏡留拂衣歸臥者賀監得同游

### 澄輝閣

在月湖之濱

嘉靖  
志

周彥廉鐔澄輝閣詩



雄健俯空闊下瞻霄漢浮眼將雲漠漠心寄水悠悠日暖鳥  
飛鏡月涼魚弄鈎行期分此景家在甬西頭

滄洲閣 廣生堂

乾道初大中趙伯圭守郡復放生池於湖上因建閣湖心寺  
內朱翊爲之記又建廣生堂于閣後嘉靖志朱灑山記見敬止  
錄

虞大令西湖鑿井

熙寧中歲大旱闕郡取給於湖湖爲之竭時虞公大寧知縣  
事既穴爲井置廬以守之記其事刻石于壽聖院詳見舒中  
丞西湖記

唐監引水注湖

四明談助 卷六

六

明爲州瀕海枕江水難蓄而善洩歲小旱則池井皆竭而是  
湖所以南引它山之水爲旱歲備熙寧乙卯歲大旱湖涸建  
中靖國改元自夏至秋不雨湖又涸民渴甚而國家將有事  
南郊上供之舟不得行上下狼顧不知所爲于是州以其事  
屬監船塲宣德郎唐意唐由南門抵它山堰前相視知溪流  
未絕特河勢中窪循隄支渠醜泄以去故水不行乃令民盡  
堙諸渠口而稍浚上源因以土補堰復累石其上以遏入江  
之流于是水稍引以北且禱于善政侯祠一息而水輒至城  
下不數日湖流清冽行舟不復礙矣宣德君唐意字居正江  
陵人清直強學不苟于其職舒中丞引水記  
湖語歲或旱甚鑿井相餉虞大寧勿幕之收不窮之養曾聞建



中之時上供之舟被阻唐監意治湖旁皇莫仗稽首長官之神實陰相焉

宋時二名僧

曇噩言寺昔有名僧二人曰處真鄞人律學主湖心二十年史忠定與之善迎以結解其逝也為祭之始大智興而得祖鑑處真鑑之嗣也曰妙蓮慈谿人再住湖心其學見于行事不為空言史忠獻曹泰字皆尊事之宋理宗時錢塘潮悍橫不可遏詔起蓮治之蓮跌坐咒施潮遂循故道敬止錄

僧妙蓮道術

四明至正志云妙蓮者湖心寺僧有道術史衛王當國錢塘江變大作延妙蓮治之乃跌坐閉目誦呪江湖頓平予生平

四明談助

卷六

不信二氏之學然推原其故深服先儒之說以為釋本于道至道何所本則未有言之者蓋斯人日役役于羣動其志氣不復能感通而道人輩寂坐槁暝反成旁出之技如妙蓮者殆亦苦身持力積久深造而後能之非聊爾之術所可幾也吾聞元泰定間海岸大崩浮屠天岸取海沙詛徧擲四隅足跡所踐海濤皆止是亦妙蓮之流也鮎埼亭集外編

湖語云是邦仙釋之場也洞天福地則有其四四明居洞天第九而梨洲

大隱山菱湖以為四明之支山並列福地佛地則有其三育王舍利岳林彌勒與戒香暗尼為三佛其

在湖上有可言者寶雲片石義通傳教延慶尊者于焉分派

見四明尊者教行錄戒香暗尼維衛佛之呈身元祐黨人瞿然下拜謂

南雄觀音遺像建炎呈夢完顏兵火所不能害即錢康憲所捨宅見延祐



志彼夫收菴則瀉山之傑崇教寺僧處真則大智之孫湖心寺僧圓覺

則能仁之秀觀音寺僧皆足以張竺國之軍乃有妙蓮其持行更

純苦心孤詣不為虛言以自文蓋嘗觀於廣陵曲江八月之

狂濤幾橫突於海門行都陸沈之勢近逼城闔而不須強弩

之射直坐嘯而止紛殆禪力之所宰出之以冥運而倍神蓮妙

亦湖心寺僧其是即令神禹再世必將招之以制支祁輔庚

辰非區區治水之徒所可論也

古岳瀆經禹治水三至桐柏山不能治禹怒召集百靈搜

命乃獲淮渦水神無支祈善應對言語形若猿猴力踰九

象禹授之童律及烏木田皆不能制授之庚辰庚辰能制

頸鎖大索鼻穿金鈴徙之淮陽龜山足下淮水始安湖語宋注

四明談助 卷六

袁氏女置廣生田

尚書袁子誠二女以奩貲置田三百四十畝捨為湖心寺廣

生田及剏行堂等屋寺僧於殿後立祠每歲忌辰祭之會集

袁氏子孫至元間燬明永樂初如琬重建今定成叢林成化志

嘉靖間尚書張時徹毀之改建書院而肖已像於中敬止錄

袁尚書子誠南渡時自南昌扈駕為臨安知府遂居於鄞子

孫四世皆大官至鏞以進士死國難見戴九靈袁氏譜序張

東沙廢袁氏祠為書院袁氏鳴於官歲久不直後張氏勢衰

而袁氏子孫控理舊案不重在毀尚書之祠而重在毀忠臣

之祠始得官斷張氏出貲建祠案遂定語見敬止錄

蔣教授講學湖心寺



蔣教授宗簡字敬之宋尚書猷之後史靜清高弟也族望表學

舍在湖心寺內湖語注聚易詩春秋諸家之說而折衷焉兩為

郡庠訓導試有司不偶輒棄去折節讀書為世名儒翰林柳

貫見其文擊節歎異方具薦牘而教授已病不起年三十有

二人以顏子方之聞志湖語所云英英蔣生學統攸歸惜哉短

折玉折蘭摧者也詳見蔣家園本傳

### 宋忠臣袁公祠

祀德祐忠臣袁公鏞在湖心寺內後改建於縣西望春橋之

東天啓間郡守王念祖始為公設祭以河棚地稅為祭費聞志

句餘土音賦袁進士祠

古梵多年廢荒祠何處尋譜稱檀越舊痛以國殤深寺本世奉袁宗

### 四明談助 卷六

正公香火佛火賢王近嵩呼聖壽臨壽聖院故有魏王祠人情良叵測天命

故難謹謝趙真無賴昌元孟傳豐皇好合襟豐太平存芳皇甫處士東生皆死節神

傷夸父杖腸斷廣陵琴黃犢誰家賣啼鵲繞樹吟精魂恥桑

海大節壯斟鄩曲筆懷慙德私嫌笑褊心謂延祐志不立傳尚書成

楚些教授補文林王深寧有挽詩蔣景高作傳况復酌名德還看振故簪

孤兒逃虎口遺裔佐商霖謂太常父子帝鑒終無爽家聲想素欽

湖邊修潔供枝上集靈禽歲薦圭田稻春烹野鹿琴寺故有田三百

畝宗正女所施道場存故牒簿正有遺鬻世事更消長忠臣無古今

百年存廟貌一旦罹凶祲椽作盧門用官將闕伯侵巧因貯

勅豪奪不須金鵲作辭巢歎鴉傳毀室音攢宮猶被毀蘭若

有誰禁卜築遷郊外旛幢總水陰今遷西郊孫枝爭仰共社木更



蕭森不腆河房稅聊充祝史踈石頭城兀兀瀝瀆水滢滢血  
已三年化丹猶九地湛昭明如在上脣鬢儼來歆明祀終山  
立豪宗已陸沉由來乘馬厩何若采薇岑

詩話袁進士祠故在湖心寺中宋人所稱壽聖院者也張  
東沙毀寺爲宅因并徙祠其亦已甚矣

### 喬生月夜遇妖

方氏之據浙東也每歲元夕于慶元張燈傾城士女縱觀至  
正庚子歲有喬生者居鎮明嶺下喪偶不復出游倚門佇立  
夜深游人漸稀見一了鬟挑雙頭牡丹燈前導一美人投西  
去生乃尾之女忽回顧微哂生趨揖問其姓名居址曰姓符  
字麗卿名淑芳奉化州判女也先人旣沒家事零替惟與婢

### 四明談助

### 卷六

二十

金蓮僑居湖西生留之宿將明別去暮則至如是者半月鄰  
翁疑焉穴壁窺之見一粉妝鬪體與生並坐明日詰之秘不  
肯言翁曰嘻子禍矣與幽陰之魅同處而不知生始驚懼備  
述厥由徑投月湖之西訪于居人並言無有乃入湖心寺少  
憩西廊有旅櫬題曰符州判女麗卿之柩柩前懸一雙頭牡  
丹燈燈下立一明器有金蓮字生見之奔走出寺借宿鄰翁  
家翁曰元妙觀魏法師符籙爲當今第一宜急往求明日生  
詣觀內拜述其事法師授以朱符二一置門一懸榻戒不得  
再往湖心生如法安擯自此果絕閱月餘往袞繡橋訪友留  
飲至醉忘法師訓取湖心寺路以回遂攝入於柩中隣翁怪  
其不歸遠近尋問至寺中停柩室見生之衣裾微露柩外發



之死已久矣遂以柩及生殯於西門外是後雲陰月黑往往見生與女攜手同行遇者輒得重疾居人大懼謁訴魏法師魏曰茲崇非吾所能治也聞有鐵冠道人者居四明山法術靈驗衆遂攀藤越澗直上絕頂果有道人坐草菴中拜告以故拒之甚岸衆言魏法師所指教望毋却道人曰老子饒舌煩吾一行至西門外結方丈壇端坐書符遣將馭之卽令鎮以白塔妖不復見

瞿佑雙頭牡丹燈記

### 寶綸堂

在月湖中卽湖心寺址張時徹改建以爲藏誥勅之所

嘉靖志

呂中父山人月湖精舍詩

元夕集張大司馬月湖精舍得清字

### 四明談助

#### 卷六

春明綠野地花罨赤霞城天爲上元好月于今夜清香塵吹不斷星漢醉將傾却有應劉輩摛詞頌太平

### 問字橋

嘉靖三十二年尚書張時徹旣廢湖心寺爲已書院乃建此

橋在湖心東橋之北

敬止錄

### 月湖菴

明張大司馬廢湖心寺爲寶綸堂此菴其餘蹟也

聞志

張氏之

精舍久毀遺趾亦屢易主今大半歸于周氏惟寶綸堂池橋石坊尚存

### 柳汀

劉戶部理柳汀詩

和者

王巨

舒亶

陳瓘



江渡隋隄千萬縷年年折盡最長條誰知烟雨汀洲晚閒舞  
春風拂畫橋

不似長安陌上梢只將離恨寄長條臨流繫得虹蜺住留作  
憧憧兩岸橋

困倚滄波綠動搖冷烟疎雨共蕭條誰將輕薄嬌春態強拂  
人頭向市橋

密幹參差籠月影輕波蕩漾蘸烟條暑天要此清涼地欲往  
何辭度小橋

謝山西湖十洲志云王巨柳汀詩曰臨流截得虹蜺住留作  
憧憧兩岸橋西憧憧橋卽今尙書橋東憧憧橋卽今館驛橋  
是逸老堂卽柳汀也聞性道乃以爲月島謬已

四明談助

卷六

五

自花嶼過柳汀其分水東從裡湖憧憧東橋經碧沚庵左  
入平橋河西從外湖憧憧西橋繞碧沚菴後入平橋河柳  
汀之上爲衆樂亭逸老堂涵虛館賀秘監祠四明驛四宜  
樓水雲亭閩國公祠關帝廟等蹟

衆樂亭

在子城西南屹立湖中東西有橋以通來往嘉祐間郡守錢  
公輔建延祐志錢公治明之日民和年豐與衆共樂爲亭于城  
西南湖中而以衆樂名焉嘉祐六年七月詔公入直左右史  
至之日抵書其友丹陽邵亢爲之記其全文見聞志

衆樂亭詩

今湖亭廟石刻尚在

序云衆樂亭居南湖之中南湖又居城之中望之眞方丈



瀛洲焉以其近而易至四時勝賞得以與民共之民之游者環觀無窮而終日不厭孟子曰獨樂與衆樂孰樂不若與衆衆樂之名于是乎書既又爲詩以記真景之萬一云  
武進錢公輔

誰把江湖付此翁江湖更在廣城中葺成世界三千景占得鵬天九萬風宴豆四時喧畫鼓游人兩岸跨長虹他年若數東南勝須作蓬邱第一宮

勢壓平湖四面佳好風明月是生涯鯨鯢背上浮三島菡萏香中放兩衙屏列已疑雲母淨簾垂不待水精奢此心會笑元丞相終日樓臺爲一家

臨川王安石

四明談助

卷六

五

使君幕府開東部名高海曲人知慕機船談笑政卽成洗濯山川作佳趣平泉浩浩銀河注想見明星弄機杼載沙築成天上路投虹爲橋取孤嶼掃除荆棘水中央碧瓦朱甍隨指顧春風滿城金版舫來看置酒新亭上百女吹笙彩鳳悲一夫伐鼓靈囂壯安期羨門相與游方丈蓬萊不更求酒酣忽化鯨魚去陳迹空令此地留

涑水司馬光

橫橋通廢島華宇出荒榛風月逢知己湖山得主人使君如獨樂衆庶必深嘆何以知家給笙歌滿水濱

丹陽邵亢

海邊民物鮮歡娛太守經營與衆俱園圃新陰多杞柳池塘



生意足魚蒲長空不碍高飛鶴淺水兼容短脰鳧此樂有誰  
知我趣歸來紅旆日西晡

城外千帆海舶風城中居市苦憧憧幾生佳景爲民老一日  
賢侯與我同道上槐陰連轡翠水邊人面照花紅寄言樂有  
時還盡徒見甘棠憶召公

渤海吳中復

賢侯新葺水雲鄉虛閣崢嶸綠渺茫波面長橋步明月人家  
疎影帶殘陽風中白鳥侵烟去雨後紅蕖擁袖香從此郡圖  
添故事歲時遺愛似甘棠

烟波空闊岸低回艸綠花紅處處堆一片湖光分島渚四邊  
山色入樓臺從來未有吾民樂此地欣逢刺史來目斷鄞江

四明談助

卷六

五

何日到京師只得畫圖開

安陸鄭榘

使君何所樂樂在南湖濱有亭若孤鯨覆以青玉鱗四面擁  
荷花花氣搖紅雲使君來游攜芳樽兩邊佳客坐翠茵鄞江  
鮮魚甲如銀玉盤千里紫絲蒨金壺行酒雙美人小履輕裾  
不動塵壯年行樂須及辰高談大笑留青春游人來看使君  
游芙蓉爲楫木蘭舟橫簫短笛悲晚景畫簾繡幙翻中流貪  
歡尋勝意不盡相招却渡白蘋洲日落使君扶醉歸游人散  
後水烟霏紫鱗跳復戲白鳥落還飛豈獨樂斯民魚鳥亦忘  
機使君今作螭頭臣游人依舊歲時新空餘華榜照湖水更  
作佳篇誇北人



建安吳充

使君新自四明歸邀我同爲衆樂詩山川可愛惜未見晝想  
夕思心爲罷恍然神遇若有得齋身乃在天之涯漲海連空  
四無岸天吳却在鮫人觀以手揮弄日月丹能令桑田變瀾  
漫海邊偶到山城中山城二月多春風牛羊間暇夕陽晚樓  
閣參差朝霧濃一泓水溜佛頭綠環似翠屏屏六曲人烟擾  
擾事嬉游落花啼鳥更汀洲中爲臺榭闌十二上有藻井排  
文楸旁人指點此何許云是四明行樂處此樂爲民非爲身  
始自集賢錢使君使君風韻誰之比政事次公詩短李醉憑  
熊軾勸耕疇狂取螺杯翻舞袂儂愛使君君勿歸詔書奪去  
知何爲閒侍玉堂香案側銀臺深阻無消息意迷却悟坐空

四明談助

卷六

五

齋忽省君詩昨日來疊紙爲君書所見不知衆樂誠然哉

王益柔

四明舊說南湖好歲久瀕厓變涂潦建旛一日得賢侯千里  
山川真再造偃月隄成車馬道湖光如截天如抱鴛鴦瓦影  
亂鳧鷖綠柳環隄花映島珠宮貝闕競來遊泉客鮫人爭獻  
寶春風浩蕩波濤起彷彿仙人騎赤鯉金盤下飭飽鱸魚塵  
事茫茫隔烟水都人士女從如雲絲竹清音兩岸聞飲酣落  
筆歌綠水爛熳天葩飄遠芬

張伯玉

句章太守錢君倚湖上新爲衆樂亭花木豈徒游子愛笙歌  
長與郡人聽坐來高韻天風起飲罷餘香夕雨零安得憑闌



縱吟筆玉觴遙對數峯青

烏程陳舜俞

湖光野色著人衣衆樂亭開此處宜擊櫂浩歌山自響踏青  
紅影岸相隨消除矰繳容鷗鳥改換風烟入柳絲荇菜藕花  
應見憶短篷孤榜獨來時

常州胡宗愈

平湖拍岸海潮通亭在平湖杳靄中花艷含春雲鳥晚波光  
照夜玉壺空動搖人影兩橋月洗滌塵襟四面風野老半酣  
亭下笑漁樵今日與民同

平蕪十頃綠含烟勝事興衰已百年島榭漫隨民意樂溪山  
應喜主人賢點妝野趣灘邊鷺彷彿妖容水上蓮日日流風

四明談助

卷六

五

轉滂俗棹歌長在釣魚船

樓攻媿湖亭觀競渡

涵虛歌舞擁艷君兩兩龍舟來往頻閏月風光三月景二分  
烟水八分人錦標贏得千人笑畫鼓敲殘一半春薄暮游船  
分散去尚餘簫管繞湖濱

重建衆樂亭記

畧

鮎埼亭集外編

宋嘉祐中錢集賢公輔來守明建衆樂亭于西湖左右夾以  
長廊澄波碧瓦有如列繡已而入直集賢繪圖紀勝丹陽邵  
安簡公充爲記司馬溫文正公光王荆公安石皆爲之詩吾鄉  
湖上故蹟得見于諸宿老集中者蓋自是亭始其後屢圯屢  
復然已遷于故亭之西非復前此中央之偉構矣明萬歷中



竟爲驛吏所據先宮詹清而復之近又毀予自京師歸草草  
改作以存先人之遺湖上諸公卽令予爲之記宋之隆也莫  
過于仁英之世其時朝有賢大臣故四方牧令亦多得人政  
通民和休風翔洽集賢之在吾鄉尤一時之望也前此湖已  
久不治集賢仿杭之西湖盡淘其淤因以其土築隄湖上環  
以花柳詩所稱偃月隄是也是亭在隄之南實遙臨之今隄  
雖不存猶幸亭之無恙焉集賢爲安定弟子與范堯夫孫莘  
老齊名學有原本故諸公倡和之詩不徒流連光景以夸一  
時之盛而多足以發集賢之志是豈近人之所能及耶集賢  
之遺愛治湖一節其小者耳然卽以小者言之蓋亦水利之  
所必需故安簡推本于其憂以致其樂夫不能憂其憂亦豈  
能樂其樂哉安簡之碑今已無存諸公詩刻亦蝕其半予將  
別礮石以勒之而附予記于其次

四明談助

卷六

七

逸老堂

在西湖上與衆樂亭相對爲唐秘書監賀知章作也祠堂在  
其西宋紹興間太守莫將建乾道五年太守直秘閣張津重  
修乾道經圖宋紹興十四年郡守莫將訪賀秘監讀書故地創逸  
老堂于月湖之曲爲文以記之其畧曰季真於長安一見李  
太白呼爲謫仙人而太白在金陵送權昭彞亦曰吾希風廣  
成蕩漾浮世受寶訣爲三十六帝之外臣卽四明逸老賀知  
章呼予爲謫仙人蓋實錄也堂成卽以太白所稱之語榜之  
曰逸老且與太白同祀 寶慶中郡守胡榘增新之改名隱



德堂合祀漢黃公以其同郡同德也開慶元年制使吳潛重建逸老堂撤黃公而合祀白自爲之記秘閣張卽之書且勒黃冠真像于碑陰語詳聞志莫吳二公碑記俱載聞志敬仰攷碑陰像贊載錢志金石門

涵虛館

宋淳熙初皇子魏王愷守郡時建在月湖中元并逸老堂改爲南北水馬二站明改爲驛嘉靖志館旁有井名涵虛井聞志館後有外椿月湖丈尺圖云湖亭外椿取碧泚八十八丈一尺魏王愷孝宗之子淳熙元年判明州輟屬邑田租以贍學得兩岐麥圖以獻帝賜手詔褒之加荆南集慶軍節度使七年薨于明州明父老乞建祠立碑以紀遺愛宋史本傳魏王妃先卒

四明談助

卷六

庚

葬于崇法寺岡鄞女墓旁見晞髮集詩王有遺書留鄞學舍多世不傳之本如徐敦五國記五十八卷見直齋書目句餘土音賦湖上故蹟

皇子魏王涵虛館

東西憧憧橋朱邸開涵虛天公留得彩虹影迎向雙橋迓使車賢王賓從盡儒雅時攜衛姬來學書王有妃善書大白山口鎖翠亭其遺墨也藏書萬卷垂百世隔岸香火精藍俱壽聖院中有王祠賀公祠字稱芳隣遊人過之交脚蹠朔風吹塵埃南北水馬驅四宜樓成不逮昔賀祠空有樗寮石賀祠碑記張樗寮卽之所書

慈水烏斯道詩

涵虛館訪章復彥不值

館在月湖中賀知章宅也



春風奈此玉人何賀監宅前春水多茶灶筆牀天上坐酒船  
花擔鏡中過紫驕何處嘶晴日白鳥當門弄碧波更愛小橋  
流水外石闌閒倚聽漁歌

賀秘監祠堂

元至元間以逸老堂并涵虛館改置水馬站分南北二館祠  
遂廢至正十九年江浙行中書省理問官邱楠奉省命修館  
舍得碣像于蕪穢中即于驛東別作祠堂三楹撤黃公李白  
位專祀賀公語見劉仁本所撰祠堂碑記

賀秘監祠

俗稱湖亭廟

在月湖中尚書橋下 元以逸老堂故址置水馬站至至正  
間始別作祠堂于驛東明洪武初并南北二館為一驛遂遷

四明談助

卷六

无

祠于今地而碑像猶在驛東永樂十六年郡守汪旭遷奉祠  
中嘉靖二十年郡守沈愷修之自為祠記天啓六年郡守王  
念祖剏為歲祀定以二月十五日載之祀典其費取鄞縣河  
棚無碍稅銀聞志沈公祠記載聞錢二志歷代祠記并祭文詳  
載敬止錄高隱學有祠記并詩亦載敬止錄

陸康僖賀監祠詩

春水微茫春草新廟亭花發鳥聲頻黃冠一曲瞻遺像明月  
三洲仰昔人故宅已憐為傳舍敝廬猶喜託芳鄰年來幸遂  
歸湖願為向先生一薦蘋

陳公顛竹枝詞

郭裡天開日月湖樓臺島嶼儼仙都近聞點綴堪圖畫一曲



能如舊鑑無

湖在城中以有賀公祠亦題曰鑑湖一曲

尚書橋畔秘書祠中有元宗御製詩歲歲仲秋明月夜湖亭

羣集唱新詞

賀祠在陸康禧公橋畔

重新賀秘監祠碑記

畧

鮪琦亭集

唐秘書監賀公有古蹟在鄞城西湖其祠址元時廢爲驛館遷祠于驛東明人改遷于驛西乃里中唐氏居其中有雙柏蓋洪武以來之物黛色參天爲游人所愛玩湖上之嘉勝也秘監籍里會稽人爭之久矣今會稽所據者新舊唐書吾鄉所據者不但李杜二公詩而以莫氏之碑會稽所據者遺墓吾鄉所據者故居考秘監先世本居會稽劉昫宋祁新舊唐書系秘監以永興其以此也秘監之生則于甬上實在城南

四明談助

卷六

三

馬湖有村曰賀家灣有池曰洗馬以秘監族祖德仁得名馬湖稍北爲響巖秘監釣臺在焉有宅曰高尙莫將之定秘監以鄞產蓋以此也秘監晚年復居會稽則剡川旣賜之後以周官湖爲放生池以千秋觀爲道場故其嗣子曾郎以貳郡侍養而墓亦在焉徐渭之列秘監于會稽寓公蓋以此也然則無事于紛爭如後人之嘵嘵也雖然秘監之至今蓋千餘年矣而能使浙東之人互引以爲前輩惟恐失之則其風流可想見也祠自康熙之季傾落日甚且二十年予自京師歸爲重新之更擬于城南釣臺之上築一祠焉乃纂是碑而系以銘

其辭曰斯人爽氣世所尊故宅荷花尙有存十洲之水清且



淪雙魚酒熟香滿樽生爲游仙死爲神越人爭公亦已勤蕭然毛生尤諄諄擗扯賢哲空紛綸我參舊籍綜舊聞

賀秘監祠柱對

全謝山撰

兩命那足榮爲卜舍元殿上六馭匆匆彼高尚心情不若投簪竟去重湖伊可樂至今偃月隄前雙魚湛湛縱淒涼江海猶能騎馬閒來

賀祠雙柏

賀祠雙柏記

節

高隱學賀公祠記云考宣德間里人宋恢志云至正間有唐繼宗者任鄞簿卒于官其子不能歸遂售月湖中殷仲明之居家焉洪武間遷祠驛西得唐地以廣之仍令居之以奉祀

四明談助

卷六

五

又云祠建于洪武戊午至庚申之春靜軒唐處士手植雙柏于庭以壯麗宮宇經今宣德甲寅五十餘載而雙柏軒昂魁偉森翠挺秀方之鄞城誠罕見者則其將來又不知參挺干霄幾尋丈也今雙柏又已二百五十年柯銅根石正當如少陵所咏孔明廟中物而所謂靜軒處士者意卽鄞簿子孫也

胡道南

文學

賀祠雙柏詩

我讀漢史仰高風知止獨有疏仲翁都門供張傳千載誰其繼者唐賀公蘭陵舊有二疏宅欲湖高風不可卽何幸生同賀公里鑑湖一曲霑遺澤一區新築近湖隄雪汀烟嶼共漣漪褰裳喜對龐公宇卜宅忻隣秘監祠祠中柏樹山中鮮一樹離奇一樹偃屢經冰雪兩湖深曾閱蓬萊幾回淺有如二



叟日相依相對如摩銅狄歸枯幹不殊鮐背瘳疎葉還同鶴  
髮稀伏臘嘗隨鄉祭酒摩挲雙樹躄躄久此是泰山廟中物  
何時得爲秘監有

### 四明驛

驛故在舊府治內乃宋通判東廳址元至元十三年移設水  
馬站于月湖中分南北二館中通橋路明洪武元年罷馬站  
設水站定今名

聞志

聞志又云攷宋刻月湖圖其地前爲逸老堂坐南面北兩橋  
之路在前乃今驛門外臨湖建坊之地也中爲古衆樂亭亭  
之左右有廡面逸老堂之前亭中通路乃今驛門及明堂址  
是也亭之後爲涵虛館坐北面南與逸老堂隔亭相對乃今

### 四明談助

### 卷六

三

驛廳與四宜樓之址是也元時分南北二館南館卽廢逸老  
堂爲之北館卽廢衆樂亭與涵虛館爲之今于驛西別建賀  
秘監祠祠前建衆樂亭皆明初所重立也

### 金仁本送人之四明詩

百官山高嵯峨梁湖渡藏龍鬪鄉巫昔日迎婆娑中郎八字  
題曹娥君今甬東去正向江頭過船頭滿載上虞酒船尾聽  
唱明州歌明州三佛地昔年我曾去記得舟人話鄉語烏撒  
飯箸魚羹阿婆燒火新婦烹有錢我亦買魚具築室海陽依  
汝住

### 明成矩四明驛館詩

使星長照岸西東水色天光面面通澄碧亭前迎畫鷁涵虛



館裡駐鳴驄秘書入道祠還在丞相封王事已空依舊春風  
楊柳綠行人來往日匆匆

孫醫士咏驛景

寧波醫學孫正科讀書能詩宣德間清軍御史駐節四明驛  
驛在月湖中址東岸陶氏女有淫行御史聞之與侍寢者通  
夜舟渡陶女同榻次日諸屬官入揖承事退祇留孫立堂下  
問曰聞汝能詩試咏驛景孫卽口占曰四明仙館絕浮埃隔  
岸桃花爛熳開春色惱人眠不得夜深船過月湖來御史赧  
然漫曰詩不佳孫對曰實景也遽斥之出明日卽行

嘉靖志  
遺事

四宜樓 水雲亭

四宜樓在驛廳後萬歷間郡守鄒希賢建樓之外跨湖爲水

四明談助

卷六

三

雲亭崇禎間邑令王章題曰印月

聞志

陳公顛竹枝詞

水雲亭子四宜樓樓外烟波亭外舟官府宴賓游不得輕橈

移泛蓼花洲

古驛從來有賸編汎湖人盡借鳴舷如今官舫無人造彩鷁  
空沈綠水邊

十洲之一亭

卽水雲亭舊名見開慶慶元志

寶慶志記云四明之所以得名者以有日月二湖月湖之所  
以奇絕者以其中有十洲十洲神仙所居也此取象焉以汀  
名者曰柳曰雪以洲名者曰芳艸曰芙蓉曰菊花以島嶼名



者曰月曰松曰花曰竹曰烟總而言之凡十湖山之勝豈惟當與邦人共之雖遠方之好遊者亦使至焉今洲之大者爲寺爲觀爲臺館未免自有其有僅存一洲詢之耆老亦莫能識廣袤不盈丈自安其小以此得全淳祐二年秋郡守陳塏政事之暇一日拉僚屬登此洲喟然曰人棄我取因其地勢命添倅趙體要植亭其上與邦之人及遠方好遊者共之遂名以是是歲十月旣領客泛舟觀保豐碑平糴倉已廼登斯亭蕪薌啜茗同此清游制幕林宗諭元晉有詩云師帥勤民衆務修挾晴領客過仙洲不緣感召豐年好安得從容暇日遊人在湖山皆自得政先倉廩百無憂老農不解君王意却要朝輶爲少留

四明談助

卷六

高

句餘士音賦十洲之一亭

詩話以十洲之一名亭甚奇然但見開慶慶元志而已則知是時十洲已無可攷是亭也歷元至明而先宮詹公重建之卽所云水雲亭是也

昔年十洲之完木可見十洲之一尚有亭十洲之一更誰問令我三歎傷我情嘉定圖經萬歷碣尋丈都非舊日程水喉三閘淤泥平蛟池百丈一勺盈清瀾之水宿莽生滿城榮衛盡阨塞誰爲疏導資流行此其大者尚如此何況十洲陳迹不過清景清

水雲亭記

畧

鮎埼亭集外編

鄞西湖之柳汀當宋嘉祐中錢集賢公輔始建衆樂亭于中



央左右夾以長廊三十間南渡後莫尚書將又建逸老堂于亭南未幾而魏王愷至又建涵虛館于亭北遂爲十洲絕勝嘉定以後居人皆呼爲湖亭元人取其地爲驛於是以逸老堂作南館涵虛館作北館叛臣王積翁之徒立祠享祀而湖上之風流盡矣方氏據有慶元幕僚劉仁本邱楠皆儒者始重爲點綴復建逸老堂於東衆樂亭于西明初并南館入北館移逸老堂與亭俱西而以其東爲花圃雖未能復柳汀之舊然稍稍振起矣先宮詹居湖上重修衆樂亭相度于驛館之後卽以魏王當日遺址作四宜樓一覽蒼茫湖光盡在襟袖其北與碧沚菴遙對有水雲亭空峙湖心欲過此亭必泛舟就之過者皆賞其結構之奇吾鄉小江湖上諸山其與大雷諸山之脉分道而下磅礴綿延直入城中其在城外者卽豐氏紫清觀一帶也其入城中者正會于柳汀之北故其氣象倍覺空濛浩渺明瑟無際而是亭適當之左顧右盼以覽其全亭之卜地蓋亦有深意存焉吾聞宮詹之爲此也監牧諸公率與薦紳先生來游環舟城下列酒爐茶具而燕集焉蓋有錢集賢之遺風百年以來湖上游蹤闐寂而亭亦日以摧舊有王忠烈公印月二字題額今亦不存嗚呼豈知昔人經營之慘淡也爰記之 是時陸氏亦築會泉亭于岸西然其地不如湖中之勝

### 閩國公祠

在月湖西公姓王氏名積翁元至元二十一年奉詔招諭日



本歿于行封閩國公謚敬愍立祠奉之泰定四年縣尹阮申  
之重建至正續志

祠即宋涵虛館地見謝山水雲亭記明廢為四明驛後驛  
移于甬東今市人私建財神殿封牆四固大失鑑湖舊觀

關帝廟

在鑑湖明崇禎三年里人大理卿陸世科建 國朝雍正五  
年奉 旨致祭前殿奉關帝神像後殿奉三代裕昌公光昭  
公成忠公神位每年春秋祭用太牢曹廟在館驛橋西當柳  
汀之東岸俗名湖西陸殿又有廟在大廟右南社壇橋之東  
係朱氏所建俗稱朱殿今陸殿已頽闕欲官修陸氏不允定  
于貫橋蕭王廟西為每年官祭之所

四明談助

卷之

五

芳草洲

劉戶部理芳草洲詩

和者

王巨

舒亶

陳瓘

春水池塘空冉冉長安古道倍依依爭如綠向芳洲遍不怨  
王孫歸未歸

十步中間水四圍不容紅紫亂相依春風管取青青在莫問  
愁人歸未歸

小雨如酥露乍晞嶼花汀柳自相依畫橋不碍尋春屐誰傍  
烟波拾翠歸

綠水映波千古恨至今南浦兩依依我今又至江東去多少  
行人宦未歸

謝山西湖十洲志云舒亶芳草洲詩曰小雨如酥露乍晞嶼



花汀柳自相依明范侍郎指爲碧沚其說是也蓋碧沚最居北而柳汀在其南花嶼又在南自史氏構別業後始改名碧沚

柳汀過芳草洲其分水東從裡湖碧沚菴左入平橋河西從外湖繞碧沚庵後入平橋河芳草洲之上爲碧沚亭爲史朝奉別業爲楊慈湖書院爲石窻山樵山澤居在明爲范司馬祠等蹟

### 碧沚亭

在月湖中丞相史彌遠建今呼爲碧沚菴嘉靖志月湖丈尺圖云碧沚東岸至魏王府八丈二尺北至紅蓮閣四十一丈聞志魏王誤作史越王

### 四明談助

#### 卷六

七

### 史朝奉別業

史朝奉守之字子仁侍郎彌大子也避勢遠嫌退處月湖之碧沚卽芳草洲吳履齋潛爲制使時有題碧沚詩呢古錄言吳中藏書家書內有舊學史氏及碧沚印者皆其遺書聞志

吳制使聞同官會碧沚詩

碧沚堂前瞰水官只應喚作玉壺看頗聞秩秩玳筵展莫遣匆匆銀燭殘酒付別腸寧怕窄詩由廣舌不憂乾老夫孤坐三更月欲往從之良獨難

萬頃蟾光浩不收花汀竹嶼思悠悠黃公所隱知何地賀監宜歸乞此洲良夜最佳惟午夜今秋偏好是中秋舉杯酒露月同吸仰面青天可問不



楊慈湖碧沚講學

楊文元公簡字敬仲慈谿人受業于陸象山學者稱慈湖先

生嘗寓史氏碧沚講學

鮚埼亭集

慈湖師陸象山九淵自為一家之學乾道中進士嘉定初授

秘書郎出知溫州累遷寶謨閣學士所著有甲乙稿冠婚記

易啓蔽等書

一統志

宋史本傳論曰楊簡之學非世儒所能及

施諸有政使人百世而不忘雖享高年不究其用豈不重可

惜哉李董山贊曰先生之學徹微究元教承忠信象山嫡傳

守正不阿穆陵之對處已臨民維禮為配

監倉呂大愚題史子仁碧沚詩

一作樓攻媿詩

相家小有四明山更葺桃源渺莽間四面樓臺相映發一川

四明談助

卷六

五

烟水自彎環

中洲纍石勢嵯峨城外遙岑聳翠螺舊說夕陽無限好此中

更得夕陽多

碧沚楊文元公書院記

畧

鮚埼亭集

淳熙四先生而吾鄞得其三沈端憲公自其父簽判已遷鄞

楊文元公則鄞產而遷慈者實與袁正獻公鼎立四先生之

門牆皆極盛而文元最高年故道尤廣先公嘗欲置書院于

鄞初擬在三江之口文元之故宅也顧其地囂不如碧沚之

清勝文元暮年所開講也文元之講學于碧沚以史氏也先

是史忠定王館端憲于竹洲又延文元于碧沚袁正獻公時

亦來預講座湖上四橋遊人如雲而木鐸之聲相聞忠定既



逝端憲正獻亦下世忠定之孫子仁不滿其叔彌遠所爲退居湖上復請文元講學故其居碧沚也甚久文元之對穆陵曰臣平日所以教彌遠者不如此彌遠置其君如奕棋穆陵爲之失色次日彌遠奏曰臣師素有心疾乞放歸田此事行狀不載故宋史亦失焉子仁受文元之教終身不應召命碧沚牙籤甚富文元因思修羣書以正邪說未就而卒嗚呼文元之學統非吾湖上所得私而要其流風餘韻之在湖上者則後人所當敬止也竹洲在南碧沚在北其亦思宮牆之弗墜焉耳矣

### 山澤居

史使君文卿聚四方奇石築堂曰山澤居自號石牕山樵

清容

### 四明談助

#### 卷六

三五

居士集 自括蒼歸來所築蓋石室也在碧沚南

湖語注

### 袁清容山澤居詩

石窻山樵晉公子獨鶴蕭蕭烟竹裏月湖一頃碧琉璃高築虛堂水中沚堂深六月生涼秋萬柄風搖紅旖旎遵南更有山澤居四面晴峯挿天倚

### 范司馬祠

少司馬范東明先生築居在月湖深處起天一閣藏書有別業在碧沚沒後卽以爲祠相傳司馬美鬚髯塑像于中至今神氣如生

碧沚亭皇明以後未考誰屬正德間爲豐考功坊所有後售之兵部侍郎范欽欽塑已像其中

敬止錄

當時出售據云碧沚



園豐氏宅今與范侍郎爲業南寓筆此券猶存天一閣

陳公顓竹枝詞

湖中碧泚水粼粼司馬當年此肅賓近日園林蕭瑟甚雙扉

深闖謝遊人

司馬范東明先生園

碧泚卽芳草洲其東岸隔水爲寶奎里史氏後府西岸隔水爲袞繡橋史丞相府北岸隔水爲偃月隄紅蓮閣自松島花嶼柳汀而至芳草洲中央四址之盡處也此爲府治

第二條朝沙